





J

1614

7

*De Spicifine*

LE  
CATON  
FRANCOIS.

AV ROY.

*pour l'usage de la Bibliothèque*

7.

M. DC. XIV.

Case

F

89

.326

161423

16

CATON

STEINWARTZ  
LIBRARY

161423

M. C. Y. V.



LE CATON  
FRANÇOIS.

A V R O Y.

S I R E,

Vn grand Philosopher ancien, voulant donner à ses disciples, vne regle pour composer leur vie; Entre plusieurs autres belles paroles, leur commanda celles-cy. De ne s'asseoir point sur le boisseau. Ne passer point la balance. Ne toucher pas à tous en la main. Et ne porter point d'anneau estroit. Bien que ces preceptes, SIRE, soient pris de choses vulgaires, & qu'ils soient vtils à tous hommes en general: Si est-ce que sans irreuerance on peut dire qu'ils le sont de tant plus aux Princes, & entre iceux à vostre Maïesté: Qu'entrant en vn âge glissant & plain de difficultez, & en vne charge grande & penible, la pratique luy en deura estre familiere dès l'entree; Et voicy, SIRE, ce qu'il leur vouloit dire. De n'estre point oisif. De ne faire violence à la iustice. Ne contracter legerement avec toutes personnes. Et ne s'assuiettir pas mal à propos, se mettant loymesmes aux fers. Leur faisant ces deffences il leur commandoit les choses opposees: Et

4  
cela, SIRE; C'est le sujet de mon discours,  
choisi expressément entre plusieurs autres,  
qui seroient à desirer en personne si esleuee,  
si en ces quatre n'y auoit assez dequoy orner  
& embellir vne ame de soy-mesme desia  
bien conditionnée (comme est celle de vo-  
stre Maïesté) & la garantir de trouble. Si ie  
l'ose outre ma portée, ce ne fera pas outre le  
deuoir: Car, SIRE, ma sujection naturelle,  
cōme François, me rendant de tous poincts  
redeuable à vostre Maïesté, & comme tel,  
obligé à contribuer & de corps & d'ame, à  
l'honneur & grandeur de sa personne, & de  
ses Couronnes, m'excuse en quelque sorte,  
Si entre si grand nombre de sujets, viuans  
sous l'heureuse domination de vostre Ma-  
iesté excellens en vertu, ie m'aduançe (le plus  
indigne de tous) de porter à la face d'une  
Maïesté si puissante, ces paroles en termes si  
grossiers & esloignez de son mérite. Ie le  
fay, SIRE, porté à cela du priuilege de mon  
âge, lequel plus que septuagenaire me fait  
prendre ceste licence audacieuse: De mon natu-  
rel libre, qui ne pouuant desguiser les choses  
les dit cōme il les pense: Et d'une affectiō vio-  
lente qui me possedde, de voir vostre Ma-  
iesté, cōme assize sur les Throñes de ses  
Ancêtres, y regner en la mesme grandeur  
& auctorité que le feu Roy son pere s'y estoit

acquise. Ce qui me fait le plus esperer de mon dessein, & de voir encores de mes yeux ce que ie souhaitte (biē qu'accablé d'annees:) C'est, SIRE, que vostre Maistē estant issue d'une si bonne tige, d'une souche si excellente, il ne peut quē retenant beaucoup de la valeur de son tronc, le temps & la saison ne luy face produire les fruiets dignes de si bonne plante. Si est-ce que comme les terres les plus grasses se ruinent faute d'estre cultiuees, & les ieunes arbres se font tortuēs par la negligence; Aussi aduient-il quelquefois que les ames les mieux conditionnees s'abastardissent, ou par la malice de ceux qui en doiuent auoir le soin, ou par leur paresse & nonchalance. C'est pourquoy, SIRE, toute la France en general, & chacun de vos suiets en particulier, ayant vn si grand interest de voir vostre Maistē, regner heureusement en son Estat; la voir aimée & obeye de ses peuples; honoree & crainte de ses voisins. Voir ses suiets iouyr sous son Empire vne vie paisible; Elle souhaitte que ceste ame qui luy est si chere, soit munie de qualitez propres à tels effects. Pour moy qui ay l'hōneur d'estre l'un des membres de ce corps, ie penserois faire tort, & à la nature, & au deuoir si contribuant le peu que Dieu m'a donné, ie ne suppliois tres-humblement vostre Majestē,



qu'ayant agreable la sincerité de mes vœux, elle daigne receuoir ce discours pour gage de ma foy, & de mon affection, & me pardonne si en iceluy j'vse peut-estre d'une liberté en paroles plus hardie qu'il ne sembleroit licite à vn sujet; donnât cela à mon zele. Les autres Roys veulent estre entretenus de paroles de foye, ils veulent estre flattez. Ceux de France ont tousiours souffert volontiers le langage de la verité, ils la veulent toute nue, sans fard ny desguisement (preuue de grand courage & genereux.) Si vostre Majesté agree ceste libre procedure, elle tesmoignera de tant plus qu'estant fils d'un Grand pere, elle est avec ses Couronnes, & autres ses vertus Royales, aussi bien heritiere de celle-là: D'aimer la franchise de ses bons seruiteurs, & affectionnez sujets, veu mesmes que celle-cy n'a pour but que l'honneur & grandeur de vostre Majesté, le bien & repos de son Estat, & la felicité de tous ses peuples.

*Ne s'as-  
soier  
point  
sur le  
boisseau.*

Ne vous asseez donc point, SIRE, sur le boisseau (pour vser des termes de nostre Sage.) La vie des Roys consiste en action, en action conuenable à leur qualité. Toute action es Princes n'est pas legitime: Celle-là seule l'est, qui a la vertu pour but, & le bien & soulagement de leurs peuples.

Or, SIRE, vostre Majesté sort d'un âge foible & debille, pour entrer en un autre plus fort & vigoureux, & par consequent plus capable de choses grandes : En un âge qui luy donnant le priuilege de Roy, le commandement absolu sur tant de peuples, l'oblige pareillement à en user, non en ieune enfant, mais en Prince meur, en Prince tout formé. Iusques icy vostre bas âge vous a promis les actions dont une enfance peut estre capable, elles vous seront desormais hors de saison : Ces actions sont trop basses pour vostre hauteſſe, il luy faut un vol plus esleué : Il n'appartient qu'aux enfans de basse condition de demeurer enfans. Ceux des Rois doiuent estre hommes-faits dès le berceau. On lit d'Alexandre le Grand encôres fort ieune, qu'estans venus quelques Ambassadeurs, de la part du Roy de Perse à Philippes son pere, qui n'estoit lors au païs : les caressant & festoyant, il ne leur faisoit point de demandes puerilles, comme ont accoustumé faire les autres enfans, touchant les vestemens de leur Roy, ou les iardins suspendus de Babylone : Mais des choses plus importantes d'un Empire : Comme du nombre de gens de guerre qu'entretenoit le Roy. En quel endroit de la bataille il se mettoit. Quel chemin estoit plus ouuert pour

ceux qui vouloient aller de la mer Mediteranee aux prouinces hautes. De maniere que ces Ambassadeurs estonnez declarerent que veritablemēt cet enfant estoit le grand Roy, & le leur le Riche.

SIRE, telles demandes sont demandes de Roys, non pas celles qui ont pour suiet des oyseaux, des bestioles : il leur faut vne estude plus serieuse; comme ils sont appelez pour commander aux autres, aussi faut-il qu'ils se disposent de bonne heure à le bien faire. Les bonnes mœurs & bonnes conditions, estans qualitez qui ne s'impriment que par long trait de temps, & lesquelles il faut cultiuier de iour en iour : autrement les ames quelques bien nees qu'elles soient, vont perdant leur force & tombent en mauuaise habitude. Larc se rompt s'il est trop tendu, & l'ame si elle est trop laschee. Il est trop dangereux à vn grād Roy de s'habituer à choses indignes de sa charge. C'est vn ply qu'il se donne, lequel par apres ( quand il le veut ) il luy est tresmalaisé de changer ( la coustume ayant vne tres grande efficace en nature; si bien qu'il luy est infiniment necessaire de s'exercer de bonne heure à choses loüables, & consonante à la qualité, & au rang qu'il tient entre les hommes : Car ce qui vne fois change contre nature, avec force & labeur, deuiant



deuient plus fort que ce qui estoit par nature. Si vostre Majesté le fait avec soin & diligence, il est sans doute qu'elle en produira les fruiçts, & que ceste bonne habitude s'imprimant en sa propre nature, desia preparee à receuoir le bien, luy fera trouuer les choses difficiles, faciles à son vsage.

Vn Ancien disoit, que pour rendre vn homme parfaitement vertueux, il faut que trois choses y concurrent: La nature, la raison, & l'exercice. Vous auez, SIRE, la premiere qui s'est fait recognoistre telle, dès vos plus ieunes ans: la seconde le temps la vous peut donner par la troisieme, si vous en auez la volonté: Et ceste volonté, SIRE, vous la deuez esmouuoir de tant plus qu'estant arriué au poinct où elle vous rendra, Vous n'en r'emporterez pas seulement la gloire de grand Monarque: mais de vertueux. Et en ces deux qualitez reside le comble de toute grandeur, & hauteſſe mondaine, par l'admiration qu'elle donne à tous, de la personne qui en est ornee & embellie.

Or, SIRE, c'est bien la le plus vtile, & la plus belle action du Prince: d'autant qu'elle regarde premierement & principalement sa personne propre, & puis va par apres ruiſſelât sur les ſujets qui en approchèt par l'vsage, & l'exercice qu'il en fait: Et cest vsage, SIRE,

luy doit estre ordinaire & familier , comme la seule obligation à laquelle il est assujetty enuers ses peuples. Obligation pourtant qui éstât de l'ésêce de sô office, l'oblige tellemēt que sans cest exercice , il cesse d'estre ce qu'il est. Et c'est ce qui auoit meu les Egyptiēs à figurer leur Roy Osiris , par la representation d'un œil , pour monstrier que le Prince est l'œil de son peuple , par lequel il doit estre mené & conduit. Et certes il est bien raisonnable , puis que les peuples se soub-mettent volontiers à l'obeïssance du Prince , & à suivre ses inclinations , que luy-mesmes aussi prenne la peine de leur commander, les choses qu'il veut estre faites. On dit que le Roy de Perse auoit d'ordinaire pres de luy vn sien Chambellan , ordonné à cela , qui tous les matins à son resueil, luy venoit dire, SIRE, leue toy , & pouruoy aux affaires. Il faisoit cela afin de resueiller par ces aduertissemens ceste partie de l'ame , en laquelle resident les affections , & qui le plus souuent s'assoupist par l'aïse & la volupté , à laquelle les Princes estans plus sujets, par la liberté que leur donne leur puissance absoluë : Ils doiuent aussi de tant plus trauailler , d'en diuertir les objets, en s'employant és choses dignes de leur occupation.

Vostre Majesté, SIRE, Bien qu'encorès

foible d'espaules , si a-elle autant que Prince du monde, nombre de fardeaux pesans à supporter : Elle commande vn grand peuple, lequel pour sa multitude , & mesmes pour son naturel prompt & courageux , a besoin d'vn mors de grand artifice , pour estre maintenu en deuoir : Et c'est à quoy vostre Majesté se doit occuper , le champ en est large & spacieux , & digne de l'occupation d'vn grand Prince. Vous en auez vne trace asseuree & domestique en la personne du feu Roy vostre pere , il vous doit seruir de patron , pour former toutes vos actions , comme le plus noble & le plus parfait que vostre Majesté peut eslire. On dit qu'Alexandre le Grand ne marchoit iamais sans son Homere ( comme son Precepteur & Cōseiller fidelle en ses guerres. ) Vostre Majesté, SIRE, en doit faire autāt de l'histoire du feu Roy son pere; elle y trouuera dequoy entretenir , non seulement sa ieunesse , mais encores tous les âges de sa vie ; Et si l'on plaist à V. Majesté d'en examiner les particules , elle y verra dès son commencement iusques à sa fin , vne suite continue de faicts memorables , autant & plus que de Prince qui fut iamais. Elle y remarquera dès ses ieunes ans , vne nourriture à la peine , vne vie champestre trauersee de mil accidens & entreprises ; Et depuis vostre âge



iufques à fa quarante-cinquierme annee, des guerres perpetuelles ; & encores depuis ce temps-là , iufques à fon deceds , vne follicitude ordinaire pour affermir la paix à cest Eftat , & le laiffer à vofre Maiefté, floriffant en toutes fortes, comme il a fait : Si bien qu'on pourroit veritablement reduire fa vie à vne feule action : Exemple notable pour vofre Maiefté, afin que fuiuant les pas d'un fi grand Pere, elle traueille auffi en fon temps, pour conferuer toutes chofes en l'eftat qu'elles les a receuës.

SIRE, Dieu n'eft pas plus admiré en la creation qu'en la conferuatiō de fes creatures : Auffi n'y a-il pas moins d'occupation pour vofre Maiefté, en l'entretienement de l'ordre, qu'au reglemēt qu'il y auoit eftably; veu mefmes qu'il eft impoffible que vofre minorité ny ait alteré plufieurs chofes par la licence que fe donnēt ceux qui ont en main, fous l'authorité de vofre Maiefté, le maniement de vos affaire. Mais à cela, SIR B, il vous faut traueillir courageufement, & à l'exemple du feu Roy vofre pere, vous en rendre capable par l'entretien que vous en deurent faire ceux qui par vofre Maiefté y feront employez. Il ne vous fuffit pas d'en cōmettre le foin à vos Ministres, fi vous n'y cōtribuez de vofre vigilance, autrement vous

ferez en danger d'estre trompé: Car ceste sol-  
 licitude, les retiendra en deuoir, & les empes-  
 chera d'entreprendre à vostre preiudice, Sça-  
 chant que vous ferez capable de descouuirir  
 leurs fraudes. Le mesme exemple vous en  
 pourra faire iuge: Iamais Prince ne fut mieux  
 seruy que nostre deffunct Roy tant qu'il a  
 vescu, & la raison de cela ne se peut donner  
 qu'à sa diligence & capacité: Car, SIRE, vo-  
 stre Maiesté est encores seruie de la pluspart  
 des mesmes officiers, & cependant il n'y a  
 nulle comparaison de l'Estat present à celuy  
 qui estoit à lors. Chacun sçait qu'outre les  
 grandes & excessiues despences qu'il faisoit  
 & dedans & dehors, tant pour l'entretene-  
 ment de la paix, & des garnisons, que pour  
 les fortifications des places, bastimens, & au-  
 tres extraordinaires, il faisoit tous les ans e-  
 spargne de plusieurs & grandes sommes de  
 deniers, tesmoins les sommes immenses qu'il  
 vous auoit laissées. A present que beaucoup  
 de ses despences sont cessées, neantmoins  
 vostre Estat s'en va tomber en la mesme ne-  
 cessité, d'où il l'auoit releué, par son œcon-  
 mie & bonne conduicte: D'où peut prouenir  
 cela? que du mauuais menage des mesmes  
 officiers, lesquels abusant de la foiblesse de  
 l'age de vostre Majesté, bastissent leurs  
 maisons aux despens de la vostre: Cela doit

mouuoir vostre Maieſté, SIRE, d'y auoir l'œil afin de diſſiper par voſtre regard ces broüillars, & y r'amener la meſme clarté & lumiere qu'ils ont chafſee, pour rauir dans ceſte obſcurité. Pource faire voſtre Maieſté, ſe doit aſſujettir d'entrer quelquefois en ſes cōſeils, pour y voir les choſes qui y ſeront traitées, elle en aura vne plus prōpte & facile intelligence par le rapport qu'il y verra de pluſieurs & diuerſes affaires, & puis ce luy ſera vn moyen pour s'ouurir l'eſprit, & ſe rendre capable des choſes plus grandes.

Ces occupations, SIRE, ſont dignes de voſtre Maieſté, & à cela i'oſe la ſemondre de tant plus fort, que ie crains que l'artifice de ceux qui veulent peſcher dans le trouble, ne taſche par tous efforts de l'ẽ diuertir, afin de n'eſtre par trop eſclairez de ſon ſoleil; & me ſemble deſia que ie les entends tenir à V. M. tels diſcours, comme prouenans de prudence d'hommie accompagnee d'amour. Hé quoy SIRE? Que feront les hommes priuez en leurs n'egoſes, ſi V. M. qui porte la Couronne & le Sceptre dès ſa nayſſance s'aſſuiettit au ſoin des affaires? ſi elle ſe donne ce travail d'eſprit, d'en apprendre l'eſtat & la conduite? Elle qui ne ſe deuroit occuper qu'en la recherche de ſes paſſetemps? de quoy vous ſeruent tant d'officiers entretenus pour cela,



s'ils ne vous soulagent de ces inquietudes? Ne craignez-vous point que ce tracas altere vostre disposition? Si vous ne le faites, SIRE, si font bien vos bons suiets, vostre teste sacree leur est trop importante, pour en vser ainsi à tous les iours.

C'est ainsi, SIRE, qu'il est à ctaindre qu'on vueille destourner V. M. de ces occupations serieuses, pour la ranger, ou à ne s'ëtremettre de rien du tout, ou s'occuper de choses inutiles, & friuoles, à fin d'auoir tousiours en main la direction de toutes choses & faire les Roys. Mais, SIRE, comme vostre Maieité a tousiours donné & donne encores beaucoup d'esperance de foy, aussi est-il à esperer qu'elle sçaura bien repousser tels discours ennellez, comme ennemis capitaux de sa grandeur. Mais encores ne sera-ce pas assez d'auoir reietté telles malices; ils en ont d'autres aussi puissantes qu'ils pourront mettre en pratique. Les plaisirs & les voluptez sont leurres aux ieunes esprits merueilleusement forts pour les attirer, & c'est en ceste part qu'il est à craindre qu'il vous attaquent & eslayent de faire par les appas, ce qu'ils n'auront peu faire par les paroles; Si vostre Maieité ne se munit de bonne heure d'armes necessaires pour repousser dès l'entrée leur violence. Car c'est ainsi qu'en ont

vſé de tout temps leurs ſemblables , pour  
 corrompre les plus belles ames Royales.  
 Ainſi en firent-ils au fils de Dion Capitaine  
 Grec. Ainſi au fils de Zenon Empereur. Ain-  
 ſi à Atalaric Roy des Gots. Et ſans aller ſi  
 loin. Ainſi en ont-ils fait vers aucuns de nos  
 derniers Rois, & ſpecialemēt de Charles IX.  
 & Henry III. Car ſil plaift à voſtre Maieſté,  
 de vous faire lire leurs Histoires, elle y verra  
 que les ieunes ans du premier eſtoient d'vne  
 merueilleuſe eſperance, & que les moyens  
 dont ils ſe ſeruirent pour eneruer ce grand  
 naturel, furent les desbauches eſquelles ils le  
 plongerent comme par force, afin que pen-  
 dant qu'il ſ'occupoit, ou à l'amour, ou à l'eſ-  
 fuſion du ſang des animaux, & en ſuitte à ce-  
 luy des hommes, ils diſpoſaſſent de toutes  
 choſes à leur plaifir, & reduiſſent ce pauvre  
 Eſtat à l'extremité, où nous l'auons veu en  
 ſon temps. Et de l'autre, quoy ? Chacun ſçait  
 que l'adoleſcence de ce Prince eſtoit admi-  
 rable, genereuſe iuſqu'à l'excez : Teſmoins  
 tant de batailles rangees, tant de victoires  
 par luy obtenuës : Et cependant vous y ver-  
 rez vn âge viril, & vn regne conſtitué en telles  
 voluptez (touſiours par l'artifice de ceux qui  
 vouloient gouuerner) qu'il n'en a remporté  
 qu'vne haine publique, & en fin la reuolte de  
 tous ſes peuples.

SIRE, C'est à vostre Majesté à ce garantir de ses pièges, & à ne donner à telles gens l'honneur de vostre oreille: au contraire elle doit auoir en execration quiconque osera luy porter telles paroles, comme indignes de l'honneur & de la Majesté d'un Prince. Ce n'est pas à demeurer les bras croisez, à satisfaire, à se parer, à employer tout son temps en pompes, en jeux, en balers, en dances, en mascarades, en tournois, que tant de grands Roys qui ont commandé le mesme Estat, que vostre Majesté, se sont acquis les eloges & titres glorieux de Magnes, d'Auguste, de Saints, de Sage, de Riche, de bien-aimé, de victorieux, de pere du peuple, de grands, d'arbitres de la Chrestienté. Ce sont leurs grandes & heroïques actions; Tant de guerres par eux demenees, tant de conquestes par eux faites, tant de travaux soufferts, pour donner paix à leurs peuples. Ce sont tant de belles qualitez qu'ils ont mis peine de s'acquérir par l'usage, leur foy, leur iustice, leur clemence, leur courage, leur magnanimité, leur liberalité, & tant d'autres belles parties, esquelles ils ont excellé en leur temps. Si vostre Majesté, SIRE, veut estre avec leurs Couronnes heritiere de leur gloire, elle se doit rendre imitatrice de leurs vertus, & l'usage familier des moyens dont ils se sont ser-



uis pour s'en embellir.

La dignité à laquelle vous estes appelé, SIRE, est honorable entre toutes, mais entre toutes aussi penible & inquiete; & c'est ce qui faisoit dire à cet Ancien, que le Prince doit dormir debout: comme fil eut voulu dire, que son repos mesmes n'est pas exempt de fatigues & d'inquietudes. Et voicy vn abrégé des occupations à quoy vostre charge vous oblige.) Faire iustice & iugemēt) en ces deux mots tout est compris. Mais pour les particulariser d'auantage. Auoir en recommandation particuliere l'Eglise de Dieu, & la pureté de son seruice en icelle. Veiller sur les Pasteurs qui y sont establis: Donner ordre que iustice soit renduë à vostre peuple. Ouyr leurs plaintes sur les abus qui y sont commis. Les corriger, & chastier les coupables. Pouruoir aux affaires de l'Estat, & de la police. Regler sa maison, & la despence d'icelle. Auoir l'œil sur ses finances, & la distribution qui s'en fait. S'instruire des affaires estrangeres. En ouyr les Ambassades. Entretenir les alliâces faites avec les voisins. En faire de nouvelles, si l'y eschet. Poursuiure la iustice des vsurpatiōs faites sur les Couronnes, & en cas de luy s'en faire soy-mesmes. Pouruoir au gouvernement des prouinces, & des places, & à la seureté de celles des frontiere. Establis

aux offices & charges importantes de l'Estat, gens de bien & capables, qui ne portent autre marque sur le cœur, que la seule fleur de Lys empreinte. Et sur toutes choses maintenir la paix entre ses peuples, par l'amitié & bonne correspondance des vns avec les autres. Ce faisant, SIRE, Vostre Majesté ne peut faillir d'estre mis au rang de ces grands Heros: Et bien que le dernier en ordre, si sera-ce avec autant de gloire & d'honneur qu'aucun d'entr'eux. C'est ainsi qu'on peut enuier la gloire d'autrui. Ceste émulation est digne d'une belle ame, & de la maison de laquelle vous estes issu. Ceste maison ne nous donna jamais que de grands Princes, & courageux, vos mesmes Histoires vous en peuvent faire foy. Ce doit estre à vostre Majesté vn vif aiguillon pour les imiter, & n'estre veu degenerer de leur vertu. Le Sceptre ne fait pas le Roy: Mais bien l'image de la Royauté. Tel a pensé l'auoir en main, qui n'en auoit que la matiere; Nostre France nous en ayant fourny d'vns & autres. Si elle nous en a donné de grands & d'Augustes, elle nous en a aussi produit de ieunes, de simples, de faineans. Si bien que de la comparaison des vns & des autres: Vostre Maieité peut faire vn choix, de vie assuré & legitime. Or ce choix vous sera de tant plus aisé à faire, qu'il n'y a point de

proportion en leur merite, ny mesmes en l'utilité qui en reüssit (sil est iuste de mesurer la valeur des choses par le profit qui en reuiét.) Ces grands Princes ont formé vostre Estat, l'ont conserué, l'ont r'estably. Ces faineants l'ont destruit, l'ont ruiné, l'ont perdu, non seulement en soy, mais aussi en eux, ne leur en estant resté ny titre ny possession. Et de cela ne se peut attribuer la cause qu'à leur paresse & nonchalance. Car pendant qu'ils fa-  
 musoient, à des operations indignes, qu'ils batissoient des maisons, qu'ils dressoient des compartimés en leurs iardins, qu'ils se toüilloient en tous delices, les Maires de leurs Palais, leurs seruiteurs, sur qui ils se deschargeoient de tous affaires, tant de la iustice, de la police, que de la guerre, prenoient tant d'autorité & de creance dans leur Estat, que de valets ils deuindrent maistres. Et de vray, SIRE, C'est pitié de voir tant de peuples soubmis à la domination d'un seul, Peuples composez de grands hommes & vertueux, d'un seul vraye idole, sans sentiment, sans mouvement. Cela seroit-ce pas pourmener sur vn Theatre, vn Diademe sourd & muet? SIRE, SIRE, Que vostre Maieité ferme l'oreille aux chants de ces Syrenes qui la voudroient conduire par telles voyes; Quiconque l'osera, tenez pour certain qu'il a mesme dessein



que les Maires anciens ou pour luy ou pour autrui. Mais plustost que vostre Majesté qui est regejton d'un si bon arbre travaillé pour en aduancer la maturité, afin qu'en son temps elle en produise les fruiets dignes, à la grandeur de luy, & au bon heur de tous ses peuples. Pourquoy, SIRE, ne le feriez vous puisque le besoin en est? Et qu'en tous les degrez de vos occupations Royales vous y trouuerés matiere tresgrande d'employ, causee par la malice de la saison? En la religion, impieté, superstition,abus.Es Pasteurs,simonie,sacrilege,auarice, ambition, desbauche, nul soing des troupeaux à eux commis. En la Iustice,corruption. Point de chastiment des coupables.Es plainctes des oppressés mespris & moquerie.Nul soing des affaires publiques, que pour les disposer au train des passions particulieres des ministres.Vostre maison du tout desfreiglee:point d'employ pour la pluspart des Officiers d'icelle, qu'autant qu'ils peuuent auoir de faueur pour se faire donner quartier.Vos finances si mal reglees & tellement prodiguees, qu'elle ne suffisent pas pour la despence des trois quarts de l'année.Les affaires & alliances estrâgeres si fort alterees qu'elles ne suiuent plus l'interest public, Mais celuy de deux ou trois qui les

gouuernent. Point de poursuittes des vsurpations faictes sur vos Couronnes, au contraire des affections violentes d'en affermir l'iniuste possession au profit des vsurpateurs. Nul soin des gouuernemens, plustost donnez aux estrangers incogneus, qu'à ceux qui les ont meritez par leurs seruices. Les offices & charges importantes de l'Estat desniees a tous autres qu'à ceux qui portent l'agraphe au manteau ou dans le cœur pour marque de leur zelle. Point d'amour de la patrie, ains vn trauail continuel pour diuiser les subiects de l'estat, & nourrir partialité entr'eux, à fin de r'allumer le feu estainct des guerres ciuilles. Bref vn desordre par tout entretenu expressement, pour y donner. Le moyen, SIRE, que l'Estat subsiste dans ceste confusion? Vous y trouuerez des sansuës de Cour affamees du sang du pauvre peuple, à qui s'est trop peu que d'auoir tout, qui ne batissent leurs maisons que de pillage. Vous y trouuerez vne Caterue de gens alterez, qui font les mauuais garçons, à fin qu'on leurs donne dequoy entretenir leurs soif, par dons & pētions, sans autre merite & seruice prealable que de leur audace, & de la recommandatiō des Mignons de Fortune, de qui par ce moyen ils demeurent esclaués & creatures seruilles à vos despens. Et c'est ainsi que

vostre espargne se trouue espuisee, & que le fonds destiné à la conseruation de l'Estat est diuertý. Je sçay bien que ce rauage est exsé del'entretienement de la paix, & de l'harmonie entre les subiects: Pourquoy maintenir il a connenu entrer en de grandes & extraordinaires despences. Et certes il en est bien quelque chose. Mais tout bien compté, il se trouuera qu'elles ont plus regardé le particulier de quelques vns que le public, sans en auoir bien considéré la fin. Cependãt telles ouuertures tirent apres elles des consequences plus dangereuses que le mal qu'õ a pensé euitier. Quoy ? l'Estat ne peut il subsister sans sa ruyne? Faudra-il que vostre Majesté achapte au poids de l'or la fidelité de ses subiectz? Et que les contributions qu'elle tire d'une main de son pauvre peuple pour les necessitez publiques soient distribuees de l'autre à aucũs particulliers d'entr'eux pour assouuir leur auarice insatiable, & leur donner plus de moyen d'entretenir leurs desbauches & despence folles? Faudra-il point en fin SIRE, que vous faciez fondre vostre Couronne pour la leur donner? Si l'Estat est assailly le deffendront ils à leurs despens? Pourquoy nos premiers Roys leur en ont ils donne les fiefs que pour les obliger à sa deffence, sans qu'il faille encores les combler du



nerf qui le soustient? Depuis quel temps nos François sont-ils deuenus mercenaires? N'auons nous plus de Perdicas qui pour toute rescompence de leurs seruices se contentent de l'esperance d'Alexandre? Et que sera-ce, quand l'extreme necessité vous contraindra de leur retrancher ce qui leur a esté donné? Ce Royaume SIRE, est vn Royaume de conséquence. Il se trouuera plus esbranlé du retranchement qu'il n'eust esté de la priuation. Ce qui nous est donné pour vn temps, nous le possedons, & en vsons comme si cestoit pour iamais, & sur cela nous batissons nostre train, & nostre despence, qu'il nous est par apres tresmalaisé de reduire au premier Estat quand ce moyen nous vient à manquer. Le feu Roy admirable en ses maximes en auoit introduict l'vsage vtillement, mais aussi sagement & prudemment. Ses liberalitez estoient des recompenses à la vertu & seruices de ses speciaux seruiteurs, elles estoient reglees au compas du merite, & octroyees sur vne grande & parfaicte congnissance qu'il auoit de leur valeur. D'ailleurs elles n'estoyent pas si estendues que son Estat en peust souffrir, celles-cy au contraire le mettent au bisac: Et sont plustost faictes à la recommandation d'vns & autres, qu'aux seruices que vous ayent rendu ceux qui

qui les reçoient, la pluspart desquels ne  
 desgainerent iamais l'espee que pour en fai-  
 re monstre. Nostre defunct Roy se faisoit  
 des creatures affidees, celles cy le font ceux  
 en faueur de qui elles sont accordees; esträge  
 ruse, vostre Majesté fait la despence & vn  
 autre en reçoit le fruiet. Et de cela, SIRE, l'es-  
 preuue s'en est faicte en vostre Minorité.  
 Combien de fois vostre Majesté (à nostre  
 honte) s'est elle veüe seule pendant qu'au-  
 cuns de vos seruiteurs estoient suiuis de ce-  
 ste tourbe à vos gages? La liberalité aux Prin-  
 ces, SIRE, est vne vertu magnanime pour-  
 ueu qu'elle ne passe à la prodigalité, qu'elle  
 soit mesuree à l'aune de la raison, & aye pour  
 obiet le merite & l'vtilité. Pardonnez moy  
 SIRE, si l'aissât le fil de mon discours i'ay esté  
 contrainct de m'arrester sur ce desordre, avec  
 quelque exegeration, la necessité d'un rei-  
 glement m'y a poussé qui sera à vostre Maje-  
 sté vne occupation non mediocre: à laquelle  
 neantmoins vous vous deuez refoudre, &  
 regler ceste partye de despence à la cognois-  
 sance que vous aurez des subiectz, ou à celle  
 que le feu Roy vostre pere vous en aura  
 donnée par ses biens faicts.

Or, SIRE, vostre Majesté aura peu voir  
 par ce que nous auons dit, qu'il est le plan ge-  
 neral de ses occupatiōs royales, pour nes'as-

*Ne pas  
 ser poin  
 la ba-  
 lance.*

seoir poinct sur le boisseau. Il en faut maintenant voir les desseins particuliers, & le principal est celluy-cy: de ne passer point la balance, (c'est à dire,) de ne faire violence à la Iustice: mais au contraire tenir la balance iuste, à fin qu'elle ne panche depart ne d'autre, outre son poids. Ce fut le subiect de la requeste que fit à Dieu Salomon ce sage Roy des l'entree de son regne. Tu bailleras (ce luy dict-il,) à ton seruiteur vn cœur qui soit entendu à iuger ton peuple, & cognoistre le bien d'entre le mal. Car qui pourroit iuger ce tien peuple qui est en telle multitude?

SIRE, vostre Maiesté a plus de subiect de faire la mesme Requeste à Dieu, sa charge est plus importante, son Estat plus estendu, son peuple en plus grand nombre. Vous deuez aussi de tant plus vous estudier en cette partie de vostre deuoir, affin que faisant iustice & iugemēt aux autres, vous soyez trouué iuste deuant sa face. C'est vne obseruation qui doit estre empreinte dans vostre cœur, comme celle qui fait les grands Roys, qui les faict craindre, & aymer: Mais elle y doit estre veritablement: car sembler estre iuste & ne l'estre pas c'est iniustice.

Vous estes donc, SIRE, obligé de faire iustice à vostre peuple; & cela en deux manieres: par vous mesmes, & par le ministere



de vos Officiers, des actions desquels vous n'estes pas moins responsable que des vostres propres s'il y a de la negligence de vostre part. C'est pourquoy vous deuez autant qu'il se peut veiller que ceux à qui vous cōmettez telles charges soyent de la qualité de ceux que Iethro conseilloit à Moyse seruiteur de Dieu de choisir pour se soullager, gens craignans Dieu, veritables, hayssants auarice: car s'ils craignent Dieu, Ils exerceront leurs charges en bonne conscience dōnant ordre qu'il soit bien & dignement seruy: S'ils sont veritables, ils chercheront tousiours en toutes causes la verité, & fermeront l'oreille aux impostures; & s'ils hayssent l'auarice, la corrigeant aux autres, ils se garderont de la pratiquer, soit par concutions ou autres mauuais moyens par lesquels ils peuuent attirer le bien de vos peuples.

C'est ouurage sera de tout plus digne de vostre Majesté qu'elle y trouuera de la difficulté en ce temps auquel on faict d'un Diable vne Ange, & du vice vertu. Car en cette condition d'hommes aussi bien qu'en plusieurs autres se voit tant de desordre qu'il faudroit faire vng monde nouveau pour reſtablir ce qui est peruertty. On n'y void plus que corruptiō, que faueur, que subtilités, que brigues, que desguisement de la verité. Pour

de l'argent & des amitez les iuges mesmes se rendent corrupteurs de leurs compagnōs, à la charge d'en faire autant pour eux aux occasiōs, & ainsi le paure, la veufue, l'orphelin l'innocēt, l'hōme de bien se voit accablé, se voit ruyné. Las ! Sainte vierge fille du ciel ou estes vous ? Je cherche & ne vous trouue point. Est-ce que vous ayez quitté l'horisō de nostre France, pour habiter entre les nations Barbares, & y exercer vos liberalitez ? Ou si c'est que vous vous soyez tellement violee, & corrompue entre nous que vous en soyez mescognoissable ? D'où vient que vous ayez tant degeneré de vostre vertu ancienne ? Et vous ne soyez plus celle à qui toutes les nations de l'Europe, remettoient volontiers leurs differens pour la reputation de vostre equité ? Non, non sainte Vierge, vous estes telle que vous estiez lors, mais vous estes plus mal seruyee : Les manquements de vos exercices ne sont pas de vous, ils sont de vos Ministres, de ceux que vous honorez de vostre pourpre, a qui vous auez commis vostre poids. Vous leur criez sans cesse à voix enrouee: Faictes iustice & iugement: N'ayez esgard à personne : Ne craignez la face de personne, car vostre iugement est le iugemēt de Dieu: Ne renuersez point le droict : Executez iustement ce qui est iuste. Ne faictes

point iniquité. N'ayez esgard à la personne du pauvre , ny consideration à la personne du grand. En cas de contention iustifiez le iuste, & condamnez le meschant. Ne receuez la face de l'inique, & ne luy portez faueur pour faire succomber l'innocent. Mais ils ont oreilles , & n'entendent point ; vos sermones leur sont des songes , vos exhortations des chimeres. Helas ! ou fera donc nostre recours ? A vous, SIRE, qui estes sceant sur le siege de iudicature, afin de dissiper le mal par vostre regard. A vous principal Ministre de ceste iustice souueraine, pour en oster le meschant, afin que vostre Throïne soit fortifié par équité. Autrement, SIRE, ce vous seroit vne charge de conscience trop insupportable : Car il est de vostre deuoir, & de tous Princes, puis que le glaiue vous est commis, de veiller sur vos troupeaux, les deffendre d'oppression, punissant les oppresseur, selon la grauité de leurs crimes, & tels sont punissables, de tant plus rigoureusement qu'ils doiuent seruir d'exemples aux autres de probité & de iustice. On lit que l'Empereur Alexandre Seuer, grand Prince, & iuste : ayant veu en sa Cour vn Arabinus, qui auoit le bruit d'auoir esté concussionnaire, en vne charge à luy commise, se print à fescrier de cholere. Et quoy Arabinus ? non



seulement est encores viuant , Mais aussi ose bien comparoistre au Senat en ma presence? Tesmoignage de la haine que ce bon Empereur portoit à ceux qui abusans de l'autorité de leurs charges , ne font conscience de rien, pourueu qu'ils en augmentent, ou leurs maisons, ou leurs amis.

Il y auoit anciennement à Rome vn certain Magistrat le plus esleué de tous , qui auoit pouuoir de corriger les mœurs des Citoyens, changer & desposer tous Magistrats abusans de leurs charges , & autres grandes prerogatiues & auctoritez ; & ce Magistrat s'appelloit Censeur. Si iamais ceste charge fut necessaire à Rome, pour maintenir en deuoir tous les Officiers de la Republique. Elle le seroit autant en nostre France : ( Bien que gouuernee sous les loix d'une Monarchie.) Et feroit vostre Majesté vne action consono-  
nante à la dignité d'un si grand Roy , si la mettoit en vſage ; Car encores qu'en nostre France les offices soient venaux, & qu'il semblast rude de desposséder vn officier sans le rembourſer. Si est-ce que les pourueuz estans obligez par serment ſolemnel à rendre iustice & droiture , il ne leur seroit point fait de tort (ſils y manquent) si avec l'honneur on les despoüille encores du bien, conſiſquant leurs offices. Mais il est ſans doute que tels Cen-

seurs, soit qu'ils fussent officiers ou commissi-  
 onnaires (pourueu que gens de bien, &  
 graues personages) seruiroient grandement  
 pour restaurer le mal en bien, & redonner la  
 vie à ceste sainte vertu, qui s'en va comme  
 esteinte & amortie: Car ceux qui ne pour-  
 roient estre reprimez par l'amour d'elle, le se-  
 roient au moins par l'apprehension de la pei-  
 ne. Nos Histoires nous font foy, que Char-  
 lemagne, & depuis S. Louys, auoient vn tel  
 soin, que la iustice fust administree dans leur  
 Estat, que souuent ils enuoyoit par les pro-  
 uinces des Commissaires, pour entendre les  
 plaintes de leurs sujets, sur ce, & leur faire iu-  
 stice, & dit en suite nostre mesme Histoire,  
 que c'est ordre qu'ils obseruoient, auoit si  
 bien estably toutes choses, que souuent les  
 mesmes Commissaires s'en retournoiēt sans  
 trouuer dequoy corriger ny reprendre.

Mais, SIRE, Encores ne sera-ce pas assez  
 d'auoir reglé vos officiers, à vacquer digne-  
 ment en leurs charges, & faire iustice à tous  
 riches & pauures, sans acception de person-  
 nes, ny de qualitez: Si elle même ne le dai-  
 gne faire es causes importantes, qui ne peu-  
 uent estre que de sa cognoissance exclusiue-  
 ment. Car en tels cas vous la leur deuez aussi  
 autant qu'il sera de vostre science & capa-  
 cité. Ne desdaignant de leur donner audian-

ce, quand ils vous en requerront. Mais aussi prenez garde, que sous ombre d'équité vous ne luy faciez violence pour en empêcher l'administration & opération, comme es remissions, graces, pardons, abolitions, & autres qui sont de droit Royal, esquelles vostre Majesté doit estre fort retenue, pour ne les octroyer sans grande cognoissance de cause: Autrement ceste belle vertu se tourneroit en vice. Car c'est autant de cruauté de ne punir les mal-fauteurs, que de faire outrage aux innocens; & Dieu qui voit toutes choses, ne laisse d'en prendre la vengeance, souvent & sur les coupables, & sur ceux qui les ont tollerez. C'est ce qui faisoit dire à Platon. Que Dieu tenant le commencement, le milieu & la fin du monde, se pourmene par la nature, faisant vne ligne droite, & qu'avec luy marche la iustice, vengeresse de ce qui a esté commis, & forfait contre la Loy diuine, pour monstrier que quelque conuiuëce que l'homme y apporte, Dieu la fait en son temps, & ainsi qu'il a ordonné.

D'auantage, SIRE, Il est encores du deuoir de vostre Majesté, de receuoir les doleâce de vos pauvres sujets, sur les exactions, rapines, & violences, tant de vostre Noblesse, que de vos Officiers. Car la voix de l'oppressé crie deuant Dieu, & telle voix l'esmeut à cholere, contre



contre ceux qui ne la veulent escouter, & luy font la sourde oreille. Le bon Prince est le recours du miserable & du delaisfé; pour en remporter le tiltre veritable, assuictifiez vous y, SIRE, à l'imitation de vos Ancestres, pour les passer encores, ou pour le moins les seconder en ceste action. Nous auons des exemples notables du soin qu'ils ont eu, & de leurs diligence en ceste partie, & entre autres, vn de Philippes Auguste, à l'encontre de Guy Côte d'Auuergne. Ce Guy ayât exigé de ses subiects avec plusieurs excez, & violences, des sommes grandes & immenses de deniers, dont plaintes reiterees luy furent par eux faictes, & l'ayât trouué coupable du faict, il le condamna par l'aduis des Barons de France, à perdre sa terre & seigneurie d'Auuergne, laquelle deslors fut reunie à la Couronné. C'est ainsi que les grands Roys se rendent venerables. Ainsi qu'ils se font aimer de leurs peuples, qu'ils sont craints, qu'ils sont redoutez, de grands, de petits, & qu'ils establisent fermement leur auctorité, & voila quand aux particulliers.

Or si vostre Majesté est abstraincte a ce deuoir enuers chacun particulier de ses peuples. Je vous laisse à pēser ce qu'elle peut estre enuers le general. Estât leur Roy vous estes leur pere commun, & eux tous vos enfans

obligé donc de les aimer esgallement, & procurer entr'eux vnion, & concorde, les maintenir en paix, les faisant iouyr de mesmes & semblables priuileges, & prerogatiues les vns que les autres, comme ses vrays, bons & naturels subiects, les honorant tous indifferement des charges honorables de son Estat sans autres differēces que de leurs fidellitez & capacitez. C'est iustice que ceux qui contribuent aux deuoirs deus au Prince, & à l'Estat iouissent aussi du bien de l'Estat, & des faueurs du Prince.

Il y a encores vn autre deuoir public de Iustice, à quoy la Majesté du Roy est obligee qui consiste es Edicts & reglemens generanx esquels vostre Maieité est tenue d'auoir l'œil sur le droit de l'autrui pour ne commander chose qui puisse tourner à son dommage avec iniustice. Car la iustice est la fin de la Loy, & la Loy œuvre du Prince qui luy empraint l'image de Dieu, & c'est par là que principalement les Roys le representent, & pourquoy l'Ecriture les appelle Dieux; en cela qu'il veut estre imité d'eux, non pas à foudroyer, à ruyner, à destrire.

Mais comme ils ne peuuent estre vniuersels en tous affaires, aussi leur aduiuent il quelquesfois de commander des choses escartees de la iustice, & du deuoir.

C'est pourquoy vostre Maieſté debura recevoir benignement les remonſtrances qui ſur ce luy pourront eſtre faites par ſes officiers, & bons ſeruiteurs, poiſer leurs raiſons, & ſe ſoumettre librement à ce qui ſera trouué iuſte & raiſonnable. Ainſi ne commandât que choſes legitimes, elle ſe pourra aſſeurer d'aſtre aymee & obeye.

Mais, SIRE, ſ'il eſt raiſonnable que votre Maieſté ſ'occupe à rendre Juſtice à ſes ſubiects, il eſt tres-iuſte qu'elle trauaille à ſe la faire à ſoy-meſmes : Et ceſte iuſtice eſt de deux ſorte, l'vne qui le regarde en l'obeiſſance à luy deuë : Et l'autre le feu Roy ſon pere au chaſtiment exemplaire du paricide & aſſaſſinat abominable commis en ſa perſonne: Et bien que ces deux membres de iuſtice ſemblent plus particuliers a votre Maieſté: ſi eſt-ce que le public y eſt grandement intereſſé, qui fait qu'elle ſ'y doit auſſi employer avec plus de zele.

Le premier, tire avec ſoy vne conſequence neceſſaire, que ſi le Prince eſt obligé de maintenir ſon peuple en paix, & luy faire iuſtice: La meſme obligation eſt au ſuiet d'aimer ſon Prince, & luy obeir. C'eſt pourquoy votre Maieſté ayant ſon autorité fondee ſur ceſte Baze, elle ſe doit efforcer de la y maintenir en ſorte qu'és choſes iuſtes, rien



n'empesche l'execution de ses volonte.

Or il y a deux moyens, par lesquels vostre Maiesté pourroit estre empeschee, l'un sous couleur de iustice, l'autre par la rebellion de vos peuples. Celuy-là, sous pretexte de vostre autorité. Celuy-cy, contre tous deux, neantmoins a vostre preiudice.

SIRE, pour certaines grandes raisons, les Roys vos predecesseurs ont estably en plusieurs prouinces de vostre Estat, des Iuges souverains qui ont la cognoissance, & iugent diffinitiuement de tous affaires; qui sont de leur iurisdiction, dans leur ressort, sans le consentement desquels vos Edicts ne peuvent estre executez: si bien qu'il arriue quelquesfois que par l'opiniaistreté & ialousie des officiers, vos plus iustes Edicts & Arrests ne peuvent passer, & demeurent sans se pouuoir executer. De sorte que souuent on les voit suiuis en vne prouince, & en l'autre non: Comme si vostre autorité ne deuoit pas estre, vne, & en mesme consideration par tout. Vostre Majesté doit a cela trouuer quelques expediens, afin qu'elle soit obeye generalemēt par toutes les prouinces de son Estat, & aussi bien a Thoulouse qu'a Paris, & ainsi es autres: le dis pour les affaires d'importance, & qui regardent le general: car il est sans doute que ceste bigarure altere bien fort le

repos public. Et de ceste nature sont les Edits de pacification, les reglemens generaux, la cognoissance des crimes au premier chef. En telles choses & autres semblables, vostre Majesté doit procurer, que iustice luy soit rendue par ses officiers: Et si j'estois capable de conseil, tel genre d'affaires s'executeroit par tout, estans passees & verifiees en vostre Parlement de Paris (comme estant le vray Parlement de France) sans attendre d'ailleurs autre consentement ny verification. D'autant que la retardation de telles affaires importe quelquefois tant au public qu'il court fortune d'en recevoir trouble. Nous l'auons experimenté en nos iours, en deux ou trois chefs generaux, & de mesme merite par tout que neantmoins par leur inexecution causent mil importunitez à vostre Majesté, & nous font reuoir en nos villes les tristes subjects de nostre malheur. Or bien vostre Majesté pourroit faire reduction de tous lesdits Parlemens en vn seul, sous le titre de Parlement de France, dont le siege principal seroit en vostre ville de Paris, auquel tous les susdits affaires generaux & autres Edicts seroient iugez, & neantmoins pour la commodité des prouinces esloignees, les officiers souuerains, qui y sont establis y seroient continuez au mesmes droicts qu'ils ont à pre-

sent, sous ledit titre de Parlement de France, en la Chambre du lieu, où ils sont à present ordonnez. Par ce moyen le public seroit seruy avec autant de commodité. Vostre Majesté avec plus de iustice & d'obeissance, & lesdicts officiers seruiroient avec plus d'honneur, estans du corps de ceste vniue & souverain Parlement. Outre que ce seroit retenir avec plus de fermeté les provinces à vn seul corps & ramener les choses à leur principe. Or comme l'establissement de ces Parlemens s'est fait à diuers temps, par aucuns de vos predecesseurs, pour la necessité des affaires de leurs regnes, & affermir de tant plus sous leur autorité les provinces de leurs ressorts fraichement réunies: Aussi seroit-il du pouuoir de vostre Majesté, si elle trouue en ceste continuation de l'interest à son seruice, comme il peut bien estre que mesme chose soit vtile en vn temps, & nuisible en l'autre, d'en changer l'ordre: Car l'on ne doit auoir en l'Estat autre but que sa conseruation & son repos. Pour lequel establir on peut vser des moyens que l'occasion met en main.

L'autre moyen par lequel l'autorité de vostre Majesté, pourroit estre empeschée est la rebellion de vos peuples, & celuy-cy comme il est fort dangereux: aussi vostre Majesté y doit-elle vser de prudence, & auparavant



que de rien entreprendre, poiser les ſuiectz pour ne rien faire mal à propos. Car bien que voſtre Maieſté ait pouuoir abſolu dans ſon Eſtat, & qu'il donne la loy telle qu'il veut à ſon peuple: Si eſt-ce que les bons Princes ſaſuiettiffent à l'entretènement de ceſte meſme loy qu'ils donnent. Si bien, SIRE, qu'en ces occurrances: Il vous faut conſiderer la cauſe & le motif de leur desbauche: Car ſi elle eſt fondee ſur la iuſtice de vos Edicts & Reglemens, vous deuez les corrigeant doucement les ramener à leur deuoir, & ordonner leur chaſtiment, non tant pour la cauſe que pour l'attentat, (n'eſtant permis au ſuiect pour quelque cauſe que ce ſoit, ſe ſouſleuer contre le Prince;) Mais ſi le pretexte de leur reuolte n'a point d'autre fondement qu'en leur mauuiſe humeur. En ce cas elle les doit reduire à toutes ſortes de deuoirs & ſoumiſſions, les chaſtians & leurs chefs, ſelon l'exigence des cas, pour ſeruir d'exemple à la poſterité. Mais à tout cela les faiſons y ſont conſiderables, & ſe doit regler le Prince ſelon l'Eſtat des choſes avec prudence & circonſpection. Et voila, SIRE, quand à la iuſtice qui eſt deuë à voſtre perſonne: voyons maintenant celle qui vous eſt deuë, en la perſonne du ſeu Roy voſtre Pere.

SIRE, voſtre Maieſté eſt obligee par tou-

tes fortes de deuoirs de se la faire faire, la nature vous y conuie, comme fils, & encores comme fils bien-aimé, vous le deuez à l'amour d'un si bon pere, & aux traualx qu'il a soufferts pour vous laisser cest Estat florissant, en repos, en biens, en multitude de peuples: Vous le deuez à vos suieuts, pour l'interest qu'ils ont en la perte d'un si bon Roy, d'un si grand Prince, ornement de l'Estat, son restaurateur, son deffenseur. Iusques icy le seul bras, qui luy aporté le coup funeste a esté chastié: Mais c'est vne trop maigre victime pour un si grand peché. Ce n'est pas assez si la teste & les autres membres qui y ont contribué demeurent impunis. Il est de vostre deuoir, SIRE, d'en rechercher les causes & les motifs, les punir exemplairement, sans acception de personnes ny de qualitez. Cest œuvre sera digne d'un bon fils, & d'un bon Roy, les fruiets duquel ne se gouteront pas seulement en ce temps: Mais encores à l'aduenir par l'exemple. Et à cela vous vous deuez employer extraordinairement: D'autant qu'il semble que cest abominable, crime faille tourner entre nous en coustume, & que d'oresnauant le meurtre & assassinat de nos Roys, ne soit pas un oser plus hazardeux que celui d'un homme priué. Ceste cause vous est commune avec les autres Princes,

qui vous

qui vous doit de tant plus semondre, de ne  
dōner repos à vostre esprit, que les Autheurs  
de cet attentat ne soient descouverts, la cho-  
se vous sera aisee & facile, si vous y procedez  
courageusement, les indices en sont tres-  
grands, la voix publique est la voix de Dieu.  
Que vostre Majesté decerne ses commissiōs  
à gens de bien & sages, qui n'ayent point d'é-  
gard à l'apparence des personnes pour infor-  
mer du fait qu'ils y remarquent les circon-  
stances, oyent les depositions qui y seront  
faites, examinent celles qui l'ont desia esté: Si  
vous le faites ainsi, ne doutez pas que Dieu  
qui est Roy prenant la cause des Roys en sa  
main, ne face voir au iour la verité toute nuë,  
d'un si mechāt & abominable crime au bien  
de vostre Estat, & à la seureté de vostre per-  
sonne sacree. Les Docteurs en sont assez co-  
gneuz en vostre France, & pleust à Dieu  
qu'ils ne le fussent pas tant: Auāt leur venue  
la France ne produisoit point de tels mon-  
stres. Pres de douze cens ans se sont passez  
en cest Estat, sans que l'on sceust que c'estoit  
que de parricide; ils nous l'ont appris en cin-  
quante ans & tellement appris, que cest ap-  
prentissage nous a rauy deux de nos Roys  
de suite. Grande pitié, SIRE, que nous ayons  
veu tout ce mal de nos yeux, & qu'encores il  
semble que nous trauaillons avec peine, pour



engraisser ces oyseaux funestes, & que nous  
 vouliôs cōme leur passer la main dessus, pour  
 les appriuoiser. O qu'il feroit bien plus expedient de les effaroucher en sorte, qu'il leur  
 print enuie de quitter nos contrees, & s'en  
 retourner d'où ils sont venus : Les sacrees  
 personnes de nos Roys nous feroient plus  
 lasseurees, nous viurions plus en repos, sous  
 leur domination, & n'aurions le desplaisir de  
 voir deuant nos yeux les mechans, qui font  
 gloire de nous raur par le meurtre de nos  
 Princes, leur amour & leur bien-veillance.

SIRE, Le feu Roy vostre pere, tres-grand  
 Prince au reste, par sa clemence excessiue, &  
 ses bien-faits, auoit pensé se conseiller l'a-  
 mour & fidelité de ses imposteurs, ou pour le  
 moins diuertir leur rage. Il pensoit (ce bon  
 Prince) que ces caresses & autres tesmoigna-  
 ges de bonne volonté en leur endroit, luy  
 seruiroient de bouclier cōtre leurs couteaux  
 d'antidot à leurs poisons, & ne s'aduisoit pas  
 cependant qu'il mettoit sans y penser le glai-  
 ue en la main de ses ennemis, dont ils le de-  
 uoient esgorger : que leur donnant l'appro-  
 che de sa personne, il leur donnoit par mes-  
 me moyen plus de commodité de luy raurir  
 ce qu'il vouloit conseruer. Toutes les autres  
 actions de ce Prince vous doiuent seruir de  
 patron pour la conduite des vostres. Celle-

cy toute seule doit estre éuitée de vostre Majesté , si elle aime sa conseruation : Ce sont espies en vostre Estat, qui par leur impudence & hypocrisie, furenttent les maisons , & les conscièces, pour bastir sur icelles ce qu'ils iugent seruir à la grandeur de ceux qui les mettent en besongne : n'espargnans pas mesmes celles de nos Roys : Tesmoing celle du feu Roy vostre pere, leur bien-faiteur: Et de cela, SIRE, il vous en peut souuenir.

Gardez-vous, SIRE, de telles gens, Ceste profonde humilité , ces reuerāces basses sont des appasts pour gagner creance, afin de paruenir à leurs desseins : Mais si vostre Majesté vouloit faire chose digne d'elle, & se mettre à couuert de leurs attētats , elle feroit de point en point executer les arrestts donnez contre eux , & banniroit entierement de tout son Estat, ceste peste, ceste contagion , qui a tant corrompu les peuples.

Vostre Majesté , SIRE, Outre les causes cy dessus, qui sont tres-grandes , qui importent à vostre personne, & à vostre Estat, est à ce conuiee, par les exemples de tant d'Estats voisins , mesmes de l'Italie, qui n'ont trouué repos qu'en l'esloignemēt de telles gens par des Edicts si authenticques qu'ils declarent anathesmes ceux qui oseront proposer leur reestablissement. Pourquoi, SIRE, seriez-vous

plus iniuste qu'eux en les supportant? Est-ce que vostre Couronne ne peut subsister sans leur entremise? Ne sçavez vous pas qu'ils ont traillé autant qu'il ont peu pour le vous arracher en la personne du feu Roy? Et qu'ils le font encores tous les iours en la vostre, par leurs escripts?

SIRE, Il est tres dangereux de tollerer dans vostre Estat si grand nombre de personnes qui ne se disent point vos subiects, qui ont vœu d'obeissance aueuglée à autre Prince que vous, qui sont obligez par ce vœu si estroictement qu'il ne leur est pas mesmes permis de demander raison de ce qui leur est enioinct. Si bien que si ce Prince, est ennemy de vostre Majesté comme elle n'a pas lettres d'une amitié perpetuelle avec, luy, se pouuant rencontrer en ce siege, des Bonifaces, des Iulles, des Leons, des Sixtes, sont-ce pas autant d'ennemis iurez qu'ils sont de personnes dans vostre Estat, de tant plus dangereux qu'ils sont ennemis couverts? SIRE, si vous attendez de leur maistres le conseil de leur bannissement, vous estes taillé de les auoir pour iamais: Ils leur sont seruiteurs trop fidelles, & trop vtiles, par leur moyen, ils fauent toutes choses, & disposent de toutes choses pour le bien de leur grandeur & domination.



Non, non, SIRE, C'est à vostre Maiesté à ordonner ce qui est necessaire pour la con-  
duiëte de vostre Estat: Elle le doit sans aten-  
dre l'aduis d'aucun : ces scrupules estoient  
bons le temps passé, que l'ignorance portoit  
nos peres à tout souffrir. A present que les  
droiëts de tous sont si clairement liquidez,  
il en faut vsfer iustement, & reprendre ce que  
nous auons laisé vsurper. Ainsi ferez vous  
iustice à vous mesmes : Ainsi à la memoire  
de feu nostre grand Roy : Ainsi à tous vos  
peuples en general: A vous mesmes d'autât  
que vous assurez vostre personne, & vo-  
stre Estat. Au feu Roy pource que leur Mes-  
chante doctrine la meurtry. A vos peuples,  
d'autant qu'ils auront plus de moyen de cō-  
seruer leurs princes, iouyr de leur amour, &  
bien-veillance & se garentir de l'infection  
que telle gens versent parmy eux.

Or SIRE, si vostre Majesté reçoit de l'hō-  
neur en l'exercice de ce second commande-  
ment de nostre Philosophe elle n'en receura  
pas moins en la consideration du troisieme.  
Celuy-là consiste à faire droiët à tous, & ce-  
luy cy à iuger prudemment des choses, exa-  
miner les occurances & sur icelles, bastir  
l'vtile, & l'honorable, l'vn tiët la balâce equi-  
table, & l'autre iuge du poix. Et cest ce qu'il  
vouloit dire quād il exorte de ne ne toucher

en la main de tous , icy la prudeuce fait ces operations , comme celle qui poise la valeur & le merite des choses presentes par la consideration des passees.

SIRE , ne touchez pas en la main de tous : Ne contractez pas amitié avec tous ; l'amitié est vne generation qui se faict par conformité & similitude : C'est pourquoy il vous faut prendre garde que celle que vous voudrez, lier soit avec subiects correspodants au merite de la vostre , estant impossible qu'une amitié se puisse bien nouër entre personnes de mœurs differentes, & façon de viure tendantes a autres fins. Les accords de la musique ont bien leur consonance par contrariété de sons : Mais en ceste consonance , & harmonie de l'amitié , il n'y doit auoir , du tout rien de dissemblable, ny d'inegal, ny de couuert , & obscur, ains doit estre composée de toutes choses pareilles, de misme volonté misme opinion , misme conseil , & toute misme affectiō, comme si ce n'estoit qu'une seule ame despartye , & distribuee en plusieurs corps.

Or telles amitez ne se peuuent contracter qu'en vne longue suite d'annees, estant malaisé d'en recognoistre promptement les subiects ; Car il ne suffit pas d'y remarquer

les apparences externes, il y faut examiner & sonder les cœurs. Celles qui se contractent par vne cognoissance parfaicte des subiects est de plus longue tenue: Et comme ce Peintre respondit à quelqu'un qui le blasmoit, du temps qu'il employoit en ses peintures qu'à la verité il estoit long temps à peindre, mais aussi que c'estoit pour long temps. De mesme celuy garde vne amitié longuement qui employe beaucoup de temps à l'esprouue.

SIRE, en toute amitié parfaicte, il y à trois chose à considerer, la vertu, comme honneste la conuersation comme plaisante, & l'utilité comme necessaire: Sans ces trois conditions elle est manque, & vostre Maiesté en ceste eminence d'honneur & de puissance, ou elle est appelée, les y doit desirer aussi bien que les autres hommes, pour iouir aussi des fruiets qu'elle produit. Or telles amitez sont de deux sortes, les vnes à contracter avec vos propres subiects, & les autres avec les estrangers: és vnes & és autres comme il y a du profit à les contracter avec personnes vertueuses: aussi il y a du hazard au contraire. C'est pourquoy vostre Maiesté auparavant que d'en venir là, doit examiner diligemment les sujets, pour ne semer en terre ingrate, & biē que celles que vous auez



à nouïer avec aucuns de vos sujets, soiēt toutes inegales pour les personnes, & que toute l'obligation soit en vnē part ; Si est-ce qu'il si trouue parité en quelque sorte, par leur amour & fidelité, laquelle n'est pas moins vtile aux Princes qu'aux sujets sa bien-veillan-  
ce & ses faueurs.

Or, SIRE, entre ceux de vos suiets, à qui vous deuez donner la main plus raisonna-  
blement & vtilement vous le deuez à vos Princes, aux Princes de vostre sang : ( Car en nostre France, tous autres qu'eux sont exclus de ceste qualité.) De tāt plus, SIRE, qu'ils sont de vostre tige, de mesme maison que vous, capables de vous succeder, que l'interest qu'ils ont à l'augmentation de vostre grandeur les oblige a y contribuer de leur soin & vigilance, & que par nature il doit auoir entre-  
vous conformité d'affections tendantes à mesmes fins : Car où peuuent-ils receuoir plus de bien, plus d'honneur, plus de grandeur ? S'ils sont hommes ils doiuent estre constans de ces conditions; puis qu'en icelles consiste tout ce qui se peut souhaitter d'excellence mōdaine. Ils ne sont iamais plus grāds  
que pres de vous; leur lustre despend de celuy que vous leur donnez, ils n'ont de l'éclat que par la reflexion du vostre. Que peuuent-ils donc esperer de mieux ? Ces considerations,

SIRE,

SIRE, vous doiuent seruir de preuue tres asseuree de leur affection, & fidelitez, puisque toutes choses les y obligent. La Nature, l'honneur & leur bien propre. A eux donc, SIRE, donnez la main asseurement, faictes leur part de vos secrets: communiquez auec eux familierement, & leur tesmoignez par toutes sortes de demonstrations extremes la certitude que vous auez de leur amour. De ceste procedure vous ne viédrez point du repétir, au cōtraire ce tesmoignage de cōfiance leur sera vn esguillon pressant pour vous continuer leurs fidelitez & se rendre de tant plus assidus au seruice de vostre Estat, & cette bonne correspondance, vn soulagement extreme à vostre Maieité, & vn moyen vtile pour vous descharger de partie du faix que vous auez apporter en ceste administration. On ne liét point qu'aucun de vos predecesseurs se soit mal trouué de cest vsage, si ont ils bien de l'opposé. Ces personnes esleues estant si ialouses de leurs qualitez qu'elles en souffrent malaisément le mespris, & portent auec impatience d'estre veus en l'Estat comme pierres de rebut, qui ne seruent que de monstre. Et à la verité SIRE, il n'est pas iuste, on doit faire estat des choses selon leur merite, & des hommes selon les vertus & les qualitez qui les honorent. Ceux-cy estās

naiz tels que nuls autres neles peuuēt esgal-  
 ler. Il est aussi bien raisonnable qu'ils soyent  
 traictez de mesmes & qu'il ayēt telle part au  
 gouuernement del'Estat que le rang qu'ils  
 y tiennent le peut requerir. Le me souuiens à  
 ce subiect d'auoir leu que Charles de Bour-  
 bon (ce grand Conestable qui à tant cousté  
 à la France) auoit fort souuent en la bouche  
 l'apophtegme d'un Gentil-homme Gascon  
 lequel enquis du Roy Charles septiesme  
 quelle chose le pourroit induire à luy rom-  
 pre la foy dont il auoit faict preuue en tant  
 d'importās affaires. Le ne pourrois luy respō-  
 dit-il y estre attiré ny pour vostre Royaume,  
 ny pour l'Empire de la terre mais bien pour  
 vne outrage fait à mon hōneur, vn mespris,  
 SIRE, my porteroit. Et certes ce Prince fit  
 bien voir à la France (bien qu'à ses despens)  
 combien le mespris touche l'ame d'un Prin-  
 ce courageux & a quel desespoir il le reduit.  
 Ceux qui viuent sont de mesme etoffe que  
 luy, qui vous doit faire prendre garde, SIRE,  
 de ne les renger à mesme extremité, afin  
 de ne reduire vostre Estat aux mesmes ac-  
 cessoires ou il s'est veu en son temps. Vostre  
 France SIRE, se resēte encores & se resenti-  
 ra à iamais de tels vsages, elle y a perdu son  
 sang, ses Estats, ses biens; elle y a veu l'un de  
 ses braues Princes captif sous la miséricor-



de de son ennemy capital, reduict à ceste extremité de luy deposter ses propres enfans pour gage. De luy quitter son bien legitime, son patrimoine, le bien à luy laissé de ses peres. Et pourquoy, SIRE, voudriez vous encourir mesme fortune? Il est iuste, SIRE, & tres-iuste que vostre Maiesté soit obeye, que son nom soit reclamé sur tous ses peuples, & que vos Princes aussi bien que vos autres sujets se soubmettent à la loy que vous leur voudrez imposer: Mais aussi vostre Maiesté doit vser prudâment de ce pouuoir & ne le pratiquer pas à toutes occurâces: car comme elle est appelée à vne charge de pere aussi doit elle quelquesfois supporter les infirmités de ses enfans de ses premiers naiz, lors principalement qu'ils n'ont pour obiet que la iustice le bien de l'Estat & la conseruation du rang deub à leur dignité. Auez vous quelque aduantage à seruir de Ministre aux passions de vos seruiteurs, & estancher leur soif ardante d'ambition, & d'auarice? Ne voyez vous pas que ces violances ne tendēt qu'à dominer, & se conseruer la tyrannie qu'ils ont vsurpee dans vostre Minorité? Et qu'ils ne se seruent de la bonté & facilité de la Royne vostre mere que pour couuerture à leur conuoitise, & domination? SIRE, SIRE, à trop presser l'enguille on la pert, il y a cin-

quinte ans que si mesme chose fussent aduenues vostre Estat seroit desia Ruyné, & vous deuez cela à la fidellité de vos peuples, Mais aussi ne se doit elle tenter, pensez vous SIRE, qu'elle ne soit rastee, qu'elle ne soit fondée. Et qu'il n'y ait plus de Princes voisins capables de ce faire? N'en voiez vous pas vn genereux & mutin tout prest les armes en la main qui ne cherche depuis long temps que les occasions de se vanger du tort qu'il estime luy estre fait és alliances contractees avec l'Espagne à son preiudice? qui sçait s'il n'y a point d'autres resorts? Et que seroit-ce si ces Princes mescontents luy prestent l'espaule? Bien qu'ils soyent debiles pour causer au corps de l'Estat vne fieure violente, si peuuent ils luy donner de l'emotion. SIRE, euites ce desordre, & trauallez deormais, non à continuer l'humeur de vos Ministres: Mais celle de la plus saine & entiere partie de vos subiects qui ne laissent d'autres vœu sainct & irreuocable de fidelité qu'ils vous ont fait, de soupirer sous la rigueur de leur domination. De plaindre la rude condition de vos Princes, & de preuoir à ceste occasiō quelque desastre dans vostre Estat, si vostre majesté par vn meilleur ordre ne met peine del'en diuertir.

Voila SIRE, les premiers & principaux

ſuiets à qui vous deuez donner la main: mais ce n'eſt pas encores aſſez. Telles perſonnes ne ſont pas à tous vſages, elles ſont bonnes pour commander aux autres, & pour les affaires importantes de l'Eſtat, il vous en faut de plus mediocres pour les ſeconder, & pour les exercices ordinaires: & ceux-là il vous les faut prendre au choix, & aduiſer de n'y recevoir que ceux de qui la probité vous ſera connue, ou par voſtre experience propre, ou que les ſeruices par eux rendus au feu Roy voſtre pere, vous en ſeruent de preuve aſſeurée: Car leur obligation n'ayant pour obiet autrè intereſt particulier que le naturel du ſuiet enuers ſon Prince, il n'arriue pas tousiours qu'on y face rencontre telle qu'on ſe la propoſe, quelquefois ſous la face d'un preud'homme, on y trouue vn hypocrite, d'un parfait amy, vn flatteur, d'un franc ſeruiteur vn traître.

Ce choix que vous ferez, SIRE, doit encore eſtre de deux genres d'hômes, les vns pour eſtre amis du Roy: (c'eſt à dire) de voſtre Eſtat. Les autres d'Alexandre (c'eſt à dire) de voſtre perſonne, les vns pour les affaires, les autres pour vos paſſe-temps, le bon choix des vns & des autres, toutesfois également neceſſaire, & leur probité & fidelité également requiſe. Car ſi le general de voſtre Eſtat a be-



soin de bonne cōduite, vostre personne n'en à pas moins, & peut-estre d'auantage. C'est pourquoy vous deuez prendre garde de n'y admettre que gens qui ne puissent corrompre vostre bon naturel, par l'accez que vous leur dōnerés prez de vous: Et pourçe qu'il est naturel à tous hommes, d'aimer la frequen-tation de ceux qui les approchent d'âge, Et neantmoins qu'il y a du danger és ieunes amitez. Vostre Majesté doit en l'eslection qu'elle en pourra faire, voir de choisir ceux qui seront le moins portez aux desbauches, esquelles les ieunes Seigneurs se laissent aisément conduire: mais les prendra d'une nature douce & paisible, afin de s'esmouuoir au bien par ses exemples ordinaires & familiers: Et tels ieunes Seigneurs seront pour accompagner vostre Majesté, en tous ses honestes passe-temps & exercices; Car pour le conseil & les affaires elle les doit prendre de ceux, à qui l'âge meur a donné de l'experien-ce aux affaires du monde. Les conseils des ieunes pouuans estre manquez en beaucoup de choses faute de prudence, qui ne se peut acquerir que par vne longue pratique & negociation. L'vsage des ieunes conseils fit perdre à Roboam, fils de Salomon, la plus grande partie de son Royaume, les boüillons de la ieunesse emportans quelquefois les hom-

mes à des entreprises mal digérées, dont les Estats se trouuent esbranlez. Il vous faut donc, SIRE, donner la main à ces deux genres d'hommes, & pour ces deux diuerses fins: A quelques anciens preud'hommes, pour le conseil & les affaires, & à quelques Seigneurs bien moriginez, pour compagnons de vos exercices: Et ainsi en l'une & en l'autre vostre Maiesté sera seruie avec plaisir & contentement, & vostre Estat avec vtilité & honneur. Et voila, SIRE, comme quoy, & avec qui de vos suiects vous pourrez donner la main vtilement. Il reste à voir comme vous le pourrez faire aux Estrangers, & à quels d'entr'eux: & bien que celuy-cy ne soit pas si important que l'autre, si est-cé qu'il est vtile, s'il est fait avec prudence, & quand ie dis cela, ie dis tout.

Pour le bien faire, SIRE, il vous y faut considerer trois choses que l'honneur de vous & de vostre Couronne, ny reçoit point d'interest, que vous ayez vne parfaite cognoissance de l'amitié de ceux que vous en voudrez honorer, & que vostre Estat en recoiue vtilité particuliere. Si vous le faites sans interest de l'honneur, il y aura égalité es aduantages: si avec certitude d'amitié, il n'y aura rien de dissemblable, rien de couuert & obscur, il y aura sincerité d'affectiō avec iustice,

si, avec l'vtilité publique, il y aura paix & amour entre les peuples, & égal profit & vtilité en la communication.

Or, SIRE, le dis donc que pour donner la main aux estrangers, & contracter alliances avec eux. Ces choses sont si considerables que sans icelles elle ne peuuent subsister. La fin de telles amitez & confederations, deuant estre la paix & le repos public, lequel ne peut estre maintenu, sans qu'entre les contractans la ville soit pareille en toutes sortes: au moins avec autant de proportion que les suiects le peuuent porter.

Sire, Ce grand Estat sur lequel vostre Maiesté commande passe en ancienneté tous les Royaumes du monde. Ce grand âge luy a donné l'experience de plusieurs choses necessaires, pour la conseruation de son estre & de sa Maiesté. Il a fait espreuue de plusieurs & diuerses amitez, selon que le temps & ses affaires, luy en ont offert l'occasion de ces vieilles assemblees, il luy en reste encores d'entieres. Et celle-là, Sire, me semblent d'autant plus asseurees, que leurs fondemens sont assez sur la conformité des humeurs & naturels des peuples; qui me feroit conseiller à vostre Maiesté de les entretenir avec soin & diligence, il en a aussi qui ne sont pas si anciennes; & bien qu'elles ayent esté entees  
dans



dans le trouble, si est-ce que la vicissitude des  
 affaires du monde en a affermy le bastiment  
 en sorte qu'il ne peut menacer ruine au dô-  
 mage des vns, ny des autres. En ces deux es-  
 peces d'alliance, nous auons ou l'amitié an-  
 cienne des peuples où la nature pour cimēt  
 de leur fermeté. Nous sommes alliez avec  
 les Allemās cōme nos freres germains: avec  
 les Flamans comme ayant esté du corps de  
 nostre Estat, & partāt liez d'amitié naturelle:  
 nous le sommes avec les Suiffes, comme  
 nos comperes, & bons amis recogneus  
 pour tels. Nous le sommes des Angloīs, &  
 bien que naturels differēds, & contrariētē  
 d'humeurs; Si est-ce que nostre France estāt  
 reunie, cōme elle est, & ramassée en vn  
 seul corps, ils ne nous peūtent porter  
 dommage, par cette grande separation  
 que Dieu y a mise: S'ils l'ont faict autrefois,  
 c'estoit sous la faueur de belles Prouinces  
 & de nombre de ports qu'ils possedoyēt dās  
 nostre Estat; Mais à present que V. M. seule  
 y est reuēree, cette apprehension ne nous  
 doit toucher. Nous en auons avec les po-  
 tentas d'Italie, Mais les bornes d'entrenous  
 & eux sont si fortes, & les Estats en si grand  
 nombre, & si petits au regard du nostre que  
 nous n'auons subiect d'en craindre l'abord.  
 Outre que Dieu mercy toutes choses sont

esgalles entre nous, quant aux droicts, chacun se maintenant dans le sien, sans auoir rien de l'autrui. Si biē que de telles alliances vostre Estat n'en peut sinon receuoir beaucoup d'vtilité, au moins point de dommage. Il ne reste plus à parler que de celle que nous auons avec l'Espagne; & de celle là j'auray à discourir plus amplement pour l'occasion qui s'en presente, Es alliances de mariage que vostre Maiesté est sur le poinct de contracter avec elle, la suppliant tres-humblement de me pardonner si ie suis contrainct pour luy représenter la verité d'vser de quelque liberté en parolles plus grande que ie ne feroit en autre subiect moings important. Mais celluy-cy estant de la quallité que chacun sçait aussi à il besoing d'estre exageré selon son merite.

SIRE, si vostre maiesté reçoit honneur de de telles aliances, si elle est asseuree de l'amitié parfaicte du Roy d'Espagne, si vos subiect y reçoient de la commodité, Vous deuez, Sire, sans autre conseil paracheuer ce qui est commencé le terminer & mettre à fin. Mais si l'honneur de vostre Maiesté y est interessé, s'il n'y à poinct en luy d'affection pour vous, si vos suiets en peuuent estre incommodéz, vostre Majesté ne doit passer oultre, ains doit casser & annuller ce qui a e-

sté fait & restabli toutes choses comme auparavant. Or qu'en telles alliances l'honneur de vostre Maiesté recoiue vne atteincte, que ce Prince ne soit porté d'aucune bonne volonté pour vous, que vos peuples n'y recoiuent profit quelconque vostre Maiesté, Sire, le pourra voir si elle prend la peine de bien considerer ce qui luy en sera dict.

Sire, si vostre Majesté veut toucher en la main de ce Prince, & cōtracter amitié & aliāce avec luy sans l'interest de son honneur, & de celuy de son Estat toutes choses doiuent estre ésgalles entre vo<sup>9</sup>, ésgalles ez persōnes, ésgalles ez conditions, & ez aduantages. Chacun de vous doit faire raison à son amy, & luy faire iustice, sans reserue, sans clause, ny restrinction quelconque; Pour les personnes, il se trouue quelque ésgalité entre vous, En ce que tous yssus de maisons Royales, & des premiers du monde, Mais elle n'est entiere, pourtant en ce que la Princesse sa fille, des l'entree de ceste alliance porte le titre & qualité de Roïne, Ou Madame vostre sœur bien qu'espouse du Prince & heritier presomptif, si est-ce que le pere pouuant suruiure le fils, il n'y a point de certitude qu'elle puisse porter la mesme quallité. Mais pour les conditions, & les aduantages le profit en est entierement à luy. Et encore qu'il semble



qu'és eschanges de personnes sans retour se trouue de l'esgalité: Si est-ce que bien considerées, il en peut par le temps tirer vtilité & nous point du tout, V. M. en est entierement forclosé par le moyen des renonciations quel'on vous à faict faere à toutes successions futures avec des clauses si extraordinaires qu'il semble qu'il aye pris subiect de l'exeredation de la Princeesse sa fille, sur l'honneur que vous luy faictes de la faire cōpagne de vostre liēt, & de vos Couronnes. Se vit il iamais de telles conditions? La faire habille à succeder, en cas qu'elle n'ait point d'ēfants, & qu'elle s'en retourne en son pays, & la desheriter entierement en cas que Dieu vous donne posterité d'elle. Seroit-ce pas luy donner subiect de ne la souhaićter puisque par ce moyen elle est priuee de ce que la nature ne luy peut autremēt desnier? Si leurs femelles peuuent succeder à leurs couronnes, pourquoy en seront elles exclufes espousant nos Roys? Est-ce qu'ils ne soiēt pas dignes de les porter? qu'elle aduantage en tire donc vostre Majesté? Elle espouse à la verité la fille d'un grand Prince, mais toute nuē sans commodité, sans esperance quelconque. De dire que le Prince espouse Madame sans qu'il en couste à vostre Maie-  
sté, il est vray, mais aussi Madame peut suc-

céder à des Couronnes ou au droicts d'icelles: Et quand ils n'en tireroient autre aduantage, que l'esperance d'un droict legitime de possession qu'ils n'ont point, & ne peuuent auoir qu'en l'espousant. N'est-ce pas pour eux vne cōdition tres-aduātageuse? D'ailleurs en ces conuētiōs on exclud point Madame de la successiō dōt elle est capable. On luy en laisse le droit tout entier: Et pourquoy donc oster celui de leur Princeesse? Si par l'vnion de toutes leurs Couronnes, en leur maison, ils la veulent maintenir en la grandeur ou elle est: N'aurions-nous pas mesme loy de le faire des nostres? **SIRE**, Vostre Majesté void l'inegalité qu'il y a és conditions & aduantages de telles alliances, passées neantmoins à la face de tant de beaux & grands esprits. D'où vient cela, **SIRE**, si ce n'est qu'ils ayent encores de ce vieil Catholicon d'Espagne, dans le cœur & sur les leures?

Encores n'est-ce pas tout; Chacun doit faire raison à son amy, ne retenant son bien avec iniustice, ains le luy doit restituer, autrement l'honneur de celui quise trouue depouillé y est engagé. Or, **SIRE**, vostre Majesté a ce repos de conscience, qu'il ne possede piece quelconque de l'Espagne: Autrefois vos predecesseurs Roys ont iouy sur eux paisiblement le Comté de Roussillon: Mais plus

iustes qu'ils n'ont esté depuis enuers eux : ils le leur ont liberalemēt restitué. Et eux, SIRE, Ne vous retiennent pas seulement quelque petite Comté : mais des Royaumes tous entiers, de grandes Duchez, de grandes Comtez. Chacun sçait qu'il ont vsurpé sur nos Roys, les Royaumes de Naples, & de Sicile, le Duché de Milan, la souueraineté de Flandres, & du Comté de Bourgongne (Et ce que ie ne puis dire à vostre Majesté, sans larmes,) Vostre Couronne de Nauarre, l'ancien patrimoine de vos ancestres. Qu'est cela, SIRE, Trois Royaumes, vne grande Duché, deux grandes Comtez. Hé quoy ? Quel amy est cecy, qui ce remplit des commoditez de son amy, qui luy rait son bien, & encores ose luy presenter la main toute plaine de ses despoüilles ? Est-ce point, SIRE, pour vous tirer ce qui vous reste ? Sire, Sire, retirez-vous. Ne touchez en ceste main rauissante. Prenez garde qu'elle n'acheue ce que depuis tant de temps elle poursuit : Il y va de l'honneur & de la conscience, l'un & l'autre nous oblige à la conseruation de ce qui nous est laissé de nos peres. Hé quoy ? le bien dont est question ne le merite-il pas ? Laissons celuy d'Italie, de Flandres, & de Bourgongne, (Bien que très-iustement vostre) & parlons de celuy qui ne vous peut estre contesté. Est-il raisonnable,



SIRE, & honorable qu'il contracte avec vostre Majesté, les mains garnies de vostre bien : De ce bien qui est tant vostre, que vos plus grands ennemis, & luy-mesmes qui en est l'iniuste detempteur, sera contrainct de le confesser? SIRE, quand ils l'auroient enuahy sur leurs ennemis, & sous la loy de la guerre, (bien qu'il ne soit permis de s'introniser au bien d'autrui :) Si est-ce qu'il seroit plus excusable: mais de l'auoir fait par trahison, sous vn faux pretexte, sans guerre prealable, & sur leurs proches parens, la cause desquels nature les obligeoit de prendre en main contre tous ; Ceste procedure tant iniuste, rend le fait si odieux, que vostre Majesté sera blasmee eternellement ; si elle ne s'en fait faire raison. Et afin que vostre Majesté en soit esclarcie, qu'elle prenne la peine de s'en faire lire l'Histoire, ou de le faire soy-mesme, l'occupation est bien digne de vostre Majesté, elle y verra de la pitié, si y en eut iamais en occurrence, quelconque : En voicy l'abregé.

SIRE, Regnant en Nauarre Jean I I I. du nom de la maison d'Albret, & Catherine sa femme ( à qui la Couronne appartenoit de son estoche. ) Le Pape Iules I I. natif de Sa-  
uonne, homme cruel, & le vray boutefeux de la Chrestienté en son temps, portant vne haine irreconciliable au Roy Louys X I I. pere

du peuple, l'un de vos predecesseurs, ( à qui ladite Catherine attouchoit de proximité de sang) duquel toutesfois il s'estoit aidé utilement en beaucoup d'occasions, sous pretexte que ce bon Prince, ne vouloit quitter la protection du Duc de Ferrare, son allié, que ce Pape vouloit opprimer iniustement, luy des-vnit la pluspart de ses alliez, & les luy opposant pour le trauffer en guerres, qu'il faisoit pour le recouurement de son Duché de Milan, les suscite encores pour la luy faire dedans son propre Estat: & pour leur en donner quelque pretexte plausible, excommunia le susdit Roy Louys, & tous ses alliez: Au nombre desquels estoit le susdit Roy Jean de Nauarre, donnant leurs Estats au premier occupant, Ferdinand V. Roy de Castille & Arragon, grand Prince: mais sans foy, sans pieté, sans humanité, lequel vn an auparavant auoit iuré alliâce avec ledit Roy Louys: voyant l'occasion propre de faire ses affaires audit Royaume de Nauarre ( apres lequel il void depuis, apres fort long temps, bien qu'il fust oncle de la susdite Catherine. ) Prit fuier sur ladite excommunication de rompre la dite alliance de France: Et feignant de luy vouloir faire guerre en son pais, enuoye ausdicts Roy & Roine de Nauarra, leur de-mander passage en leurs terres pour son armee,

mée, laquelle cependant ne laissant d'entrer, & s'approchant de Pampelune, ville capitale dudit Royaume, en laquelle il auoit pratiqué des intelligences, par le moyen de certains traistres Beaumontois sujects; mais qui auoient grande creance dans ledit Estat, il se saisit de ladite ville de Pampelune, le vingt-quatriesme Iuillet, mil cinq cens douze, & poursuivant son entreprise, s'empare facilement de toutes les autres villes dudit Estat, qui sont dela les Monts: Si bien que ne luy ayant esté fait aucune resistâce par ledit Roy Iean, pour auoir esté surpris, & ne s'estre trouué forces suffisantes sus pied, il en seroit demeuré maistre, & ledit Roy Iean contraint de se retirer en France, és terres qu'il y auoit, sans que depuis il luy fust possible, ny à ses successeurs, de r'entrer en la possession dudit Estat. Lequel les Roys d'Espagne heritiers dudit Ferdinand, ont conserué & maintenu, du depuis en leur maison, comme ils font encores. Et ce Roy Iean d'Albret, SIRE, estoit en droite ligne, tris-ayeul de vostre Majesté: ayant laissé de ladite Chaterine Henry I. son successeur, & luy Ieanne Royne de Nauarre, mere du feu Roy vostre pere. Tellement, Sire, que vostre Majesté void le tort qui vous est fait par ledit Roy d'Espagne, en l'iniuste possession qu'il a de ceste Couronne; si légi-



timemēt vostre, & si iniustement vsurpée sur vos ancestres, Ces proches parens, par ses predecesseurs.

SIRE, Dieu est iuste, il punit les hommes pour leurs demerites, mais aussi quand ils se recognoissent il retire son bras. Il a chastié vos predecesseurs Roys de Nauarre; Il semble qu'à present il en veille rompre les verges. Il s'est seruy d'un puissant Roy pour les corriger eux qui estoient foibles. Et qui sçait, Sire, s'il n'a point permis que ceste couronne soit tombee en la maison de France, grande & puissante, expressement, affin de se seruir d'elle pour la releuer & la remettre sur vostre teste? Et qu'ayant esté rauie sur vn Roy foible de reins, elle soit reconquise par vn Roy fort & puissant? Il seroit à l'aduanture excusable en vn Roy de Nauare, de n'entreprendre le recouurement de ce bel Estat contre vn si puissant vsurpateur. Mais à vn Roy de France, Sire, il n'est pas seulement sans excuse, mais il seroit honteux, il seroit vituperable. Et que sera-ce donc, si ce grand Roy touche en la main du ravis-seur contracter alliance avec luy, & luy donne comme vn titre de son larcin? Sire, chacun le sien n'est pas trop: Si ce Prince recherche vostre amitié qu'il commence par la restitution de ce qu'il vous detient, apres

cela, bons amys, b<sup>o</sup>s aliés, il est mal-aisé d'aymer ceux qui occupent nostre bien, il n'est pas Iuste de le faire.

D'ailleurs, SIRE, qu'elle grande assurance auez vous que le Roy d'Espagne recherche vostre alliâce pour l'amitié qu'il vous porte? Estce que ses predecesseurs ou luy ayēt tousiours procuré le biē & la grandeur de vostre Estat? Qu'ils se foyent employez a le vous cōseruer? Helas a qui le voudroit on persuader? SIRE, Parcourez toutes vos prouinces & y voyez les ruynes de vos villes & de vos villages: ce sōt les fruiçts de leur amour de leur soing & de leur diligence. Demandez-le a vos anciens & ils vous diront que depuis cent ans & plus, ils n'ont cessé de trauailler vostre Estat, soit par guerres ouuertes, ou par leurs menees & pratiques sourdes, desbauchans de tout leur pouuoir les suiectz, d'ice-luy, & semans diuision entr'eux affin d'aduācer leurs affaires dans ce desordre. Mais particulièrement SIRE, que n'ont-ils pas faict au preiudice du feu Roy vostre pere? A il tenu en eux qu'il ne se soit veu priué de ceste Couronne que Dieu luy auoit preparee depuis tant de siecles? Dequoy ne se sont ils poinct seruis pour paruenir à ce desseing? n'en sont-ils pas venus iusques aux attentats sur sa personne, & sur sa vie? SIRE, vostre

Maieſté ne permettra s'il luy plaist de luy faire encores à ce subiect le recit d'vne hiſtoire tres-veritable,teſinoignee par vn fort homme de bien d'être vos ſubieſts,employé en ceſte action,comme eſtant lors Secretaire du ſieur de Sain&t Sulpice , Ambaſſadeur pour le Roy Charles neufieſme,prez le Roy d'Eſpagne Philippes , pere de celuy à preſent regnant, de la bouche duquel ie le tiens, par lequel recit V.M. pourra iuger de la verité de ce que deſſus.

SIRE, en l'annee mil cinq cens ſoixante deux,ledict Roy Philippes tenant les Eſtats des Royaumes d'Aragon , Catalogne & Valance en la ville de Mouzon,& la Royne d'Eſpagne Elizabet,ſille de Heury II.Roy de France, eſtant demeuree à Madril. Il arriua audi&t Madril vn nommé le Capitaine Dimanche,qui ſe diſoit venir de Portugal pour les affaires de l'Infante(ce qui eſtoit faux comme il confeſſa depuis ) eſtant demeuré malade ,& incommodé au logis ou il eſtoit,il ſ'informa s'il n'y auoit poin&t en la ville de François , & ayant deſcouuert que la Royne en auoit vn valet de chambre, il l'enuoya prier de le venir voir,& aprez luy auoir repreſenté ſon incommodité ſur les offres à luy fai&tes par le Valet de chambre de ſa maiſon,il le prit au mot, & ſ'y fit por-



ter. Dans huit iours estant reconualu. & de-  
uisant du subiect de son voyage avec son  
hoste, il luy confessa qu'il venoit de trou-  
uer le Duc d'Albe de la part d'un Prince  
Estranger qui auoit lors la meilleure part  
au gouuernement des affaires de France  
( le fils duquel s'est veu depuis à deux  
doits de s'en voir la Couronne sur le  
chef,) & tirât de sa Mallette vn paquet, luy  
monstra quelques lettres dudiect Duc Dalbe  
audiect Roy Philippes, & à Dom François de  
Alaba, pour luy faire donner audience. Le  
subiect desdictes lettres & de son voyage,  
estoit pour fauoriser vne entreprise dres-  
see contre la Royne de Nauere vostre  
ayeulle, & ses enfans qui estoient le feu  
Roy vostre pere, & deffuncte Madame Ca-  
therine sa sœur, tous lesquels estoient  
lors en Bearn en leur ville de Pau. Et  
cela afin de se saisir de leurs personnes,  
& les mener tous à l'inquisition en Es-  
pagne. Le dessein de l'execution estoit tel.  
Le Roy d'Espagne auoit vne grosse armee  
toute preste à Barcelonne, destinee ( selon le  
pretexte ) pour la Flandre : Il en deuoit faire  
passer dix ou douze mil hommes, le long des  
montagnes de Foix, iusques à Pau; Où estans  
assistez des Sieurs de Montluc, d'Escarts, &  
d'Orthe, qui estoient de la partie ausquels ce

Prince estranger en auoit escrit, ils deuoient surprendre ladite Royne de Nauarre, dans ladite ville de Pau: Comme ils eussent fait infailliblement (n'estant en aucune desffiance,) Si ce valet de chambre n'eust trouué moyen d'en faire aduertir la Royne d'Espagne, qui despeschant aussi tost audit sieur de saint Sulpice Ambassadeur, qui estoit pres du Roy, luy commanda d'en escrire audit feu Roy Charles, & d'en faire aduertir en passant ladite Royne de Nauarre, avec charge expresse de faire prendre garde à ce que deuendrait ledit Capitaine Dimanche: lequel estant pres du Roy & descouuert par ledit sieur Ambassadeur, fut remarqué que trois ou quatre audiances luy furent donnees de nuit, sous la conduite dudit Alaba, & r'enuoyé en diligence vers ceux qui l'auoient despesché. A l'heure mesme ledit sieur Ambassadeur le fit suiure, par le personnage de qui ie tiens ceste Histoire, avec despesches au Roy, & lettres de creance pour la Royne de Nauarre, lesquelles il luy rendit en passant: & apres luy auoir discouru amplement de tout le fait, continuant son voyage, se rendit à la Cour du Roy, aussi tost que ledit Capitaine Dimanche, lequel aduertý de l'arriuee dudit Secretaire, & se doutant qu'il pouoit estre descouuert, se teint si bien caché, que quel-

que exacte perquisition qui s'en fist on n'en peut iamais auoir autre nouuelles, de sorte que leur mine estant esuentee, elle ne peut faire aucun effet.

Et voila, SIRE, comme ces Princes ont tousiours aimé vos peres, comme ils sont encores vostre Majesté, tant que la commodité de leurs affaires le peut permettre, & qu'ils trouueront dequoy s'establiir. Ils voyoient bien que ce Prince, vostre Pere, qui dès ces ieunes ans tesmoignoit vn grand courage, leur estoit vn obstacle, pour la paisible iouissance de leur vsurpation; que luy & Madame sa sœur, esteints & consummez du feu de leur inquisition, ils n'auroient plus que craindre, ne restans que de foibles & debiles heritiers impuissans pour vne si haute conqueste. Et c'est ainsi que ces Princes se sont faits grands. C'est en l'vsage de ces moyens qu'ils ont amassé tât de Courônes l'une sur l'autre. Ils n'estoient que petits Roytelets de Castille, n'y a pas six-vingts ans, leurs inuentions, leurs menes, leur mauuaise foy, leur ambition, & leur auarice insatiable les ont accreuz ainsi que vous les voyez, aux despés de tous les Estats du monde: Et specialemēt de celuy de France. Et apres cela, SIRE, vostre Maiesté luy voudra toucher en la main, contracter vn nouuel d'alliance si estroite avec luy. Hé que diroiet



les nations? Qu'un Roy de France bien conditionné, entrât en un âge fort & vigoureux, martial, aimé, chery de ses peuples, peuple en grand nombre, riche, puissant, & courageux, offensé en tant de sortes, despoüillé de son bien, donne la main d'association à l'usurpateur, à son ennemy? Ennemy capital, qui ne vanaille qu'à sa ruine? Las! pauvre France, quel peché, quelle faute ta rendu si coupable que d'encourir vne si rigoureuse punition? Et qu'il faille que ton fleau vniuersel triomphe de toy, qu'il soit vommy dans ton giron, comme un venin contagieux aux extremités, par vne vertu expulsive de la nature, afin qu'il exerce contre toy sa dernière rage & fureur? Pardonnez moy, SIRE, si ie passe les bornes de la modestie: donnez cela à la iuste douleur qui me point, pour le triste ressouvenir de nos malheurs passez, & l'apprehension que i'ay d'une recheute. Et Dieu vueille, SIRE, que ie n'en sois point le prophete: Si est-ce que j'oseray dire à vostre Maiesté, & la supplie tres-humblement de s'en souuenir, que la perfection de telles alliances, ne luy peut apporter qu'un repentir en croupe.

Mais quand bien toutes ces raisons particulières à vostre Maiesté ne seroient considerables, l'intérêt public, SIRE, le vous doit estre.

estre. Quelle commodité, quel aduantage luy en reient-il? La communication de les peuples, nous est tant à contre-cœur; pour leur fierté & arrogance, que le seul nom nous en est odieux. **SIRE**, Nous nous passerons fort bien de tels freres, leur frequentation nous couste trop: Nous vous supplions tres-volontiers, de les laisser dans leurs Montagnes, & nous permettre sans eux (sous vostre Majesté) l'usage de nos plaines. De quoy nous seruent-ils? que nous amènent-ils, que de la despêce? Qu'est-ce qu'ils nous enuoient pour ameliorer nostre condition? Rien du tout, **SIRE**, qui soit necessaire; Ils nous enuoient des pistolles: mais pour corrompre nostre fidelité. Et pleust à Dieu qu'ils n'en fussent pas si liberaux; nous ne verrions parmy nous tant de traistres, tant d'hommes de nature. Et donc? puis qu'elles ne nous seruent que de tresbuchement, pourquoy tant de passion pour ces alliances? Contentons, contentons nous, **SIRE**, du passé, & nous faisons sage par nos exemples: Ainsi le font ceux qui aiment leur conseruation. Ce faisant vostre Maiesté en remportera le titre de grand & de sage, & vos peuples la paix & le repos entr'eux, à la splendeur de tout vostre Estat.

Or, **SIRE**, Ce n'est pas tout d'auoir veu comme quoy vous pourrez contracter, en

quelle main vous pourrez toucher vtilemēt:  
Il faut encores aduifer de ne porter point  
d'anneau estroit : De ne vous mettre pas  
vous-mesmes aux fers, de ne vous assujettir  
 pas mal à propos. Et cela, SIRE, est de tant  
 plus considerable à vostre Majesté, que vo-  
 stre autorité Royale y receueroit de l'inte-  
 rest, autorité comme absoluë, aussi qui doit  
 estre plus libre & moins sujette à captiuité &  
 seruitude. Les Roys asseruissent les autres  
 hommes, eux seuls demeurent libres, en tou-  
 tes autres choses qu'au deuoir de iustice, à  
 quoy ils leur sont obligez, & ceste seruitude  
 est qui les fait Roys & libres. De ceste  
 obligation, SIRE, vostre Majesté ne s'en peut  
 descharger, & ne le doit: C'est vne charge  
 fonciere annexee à vostre Couronne, dont  
 vous leur estes redeuables. En toute autre  
 chose vous deuez-vous en exempter, si vous  
 estes ialoux de la charge qui vous est com-  
 mise.

Or en ce deuoir de iustice sont compris  
 toutes les exceptions qui se peuuent repre-  
 senter en ceste liberté des Princes. Car bien  
 qu'ils ayent autorité de tout faire: si est-ce  
 que la iustice veut qu'ils s'assujettissent à ne  
 rien faire que de iuste & d'équitable. Et ceste  
 équité qu'ils maintiennent leurs peuples en  
 paix, & que pour ce faire ils vsent de tous



moyens propres & expediens : mesmes iufques à ce qui pourroit sembler faire preiudice à leur autorité. Car s'assujettissant en ceste maniere, ils se mettent en liberté, commandans d'une puissance plus absoluë, par l'obeissance volontaire de leurs peuples, & c'est en ses occurrances que doit luire le plus leur sagesse & prudence, par la difficulté que ce leur est de desroger à ceste puissance vniuerselle, qu'ils ont sur leurs sujets en leur relaschant pour le bien de la paix quelque chose de l'autorité.

Vostre Majesté, SIRE, commande vn peuple, vers lequel il luy est necessaire d'vser de ceste benignité : La diuersité des sentimens de leur foy, luy en estant vne matiere ordinaire, par la diuision qu'elle produit entr'eux. En ces occasions, SIRE, vostre Maiesté doit aller avec circonspection, & ne s'arrester pas tant à la conseruation exacte de son autorité, comme à la conseruation de la iustice, & à l'amour qu'il doit à ses peuples. Or le principal membre de iustice, est celuy qui regarde le seruice que tous hommes doiuent à Dieu. Auquel ils ne peuuēt estre empeschez, mais il est de vostre deuoir, puis que c'est la volonté de nostre Dieu commun, de remettre encores pour quelque temps, la reünion entiere de ses fidesles en son Eglise, d'en at-

rendre le temps & la saison : & cepédant vser de tous moyens propres à cet effet. Aucuns de vos predecesseurs mal conseillez en ont pratiqué de plus violens : mais avec ruine & dommage. Le feu Roy vostre pere grand Prince & sage vous en a mōstré de plus doux & de meilleurs. Et vostre Maiesté void, comme quoy il s'en est trouué : avec la paix vniuerselle, l'abondance de toutes choses, & la conuersion de plusieurs esprits, il en a r'emporté l'amour passionné de tous ses peuples, qui de luy est descendue iusques à vous : Si bien que la memoire de son Auguste nom leur est de plus en plus matiere de larmes iournalieres. Outre qu'à cela vous estes obligé par iustice, & le deuoir qui est deu à Dieu, vous l'estes encor par l'amour que vous leur deuez, comme leur Roy : Et cet amour veut que vous preferiez à vostre particulier, leur bien & leur repos : pourueu qu'aussi ils ne s'esloignent de ce qu'ils vous doiuent ; Mais qu'en la recognoissance de vostre Maiesté, ils luy obeissent & la seruent avec la fidelité requise a bons & naturels suieds. De ceste suiection volōtaire à laquelle vous vous soubzmettez : Vostre Maiesté ny vostre Estat ny reçoit aucun eschec. La Couronne & le Sceptre vous en demeurent : Et si ainsi ie l'ose dire, avec plus de fermeté qu'autrement. Ceste

diuersité bien mesnagée pouuant seruir de bride pour retenir en deuoir toutes choses, & de contrepoids aux mauuaises humeurs de vostre Estat-Ie ne dy pas cecy pour interest que i'y aye, car toutes choses m'exemptent d'apprehension contraire: ma profession Orthodoxe, mon âge caduc & attenué; & mon naturel propre disposé à tous euene-  
mens. Le seul deuoir de Compatriotte m'y pousse, qui m'oblige à l'amour de mes semblables & au bien de vostre Estat dans lequel ie vis.

Sire, voicy vn autre subiection à laquelle vostre Maïesté est encores obligee; de tant plus forte qu'elle est vne des colônes sur lesquelles vostre Monarchie est fondee, & qui est tant de son essence qu'il n'est pas au pou-  
voir de son Prince de l'alterer sans violer les loix fondamentales de l'Estat. C'est celle qui vous oblige à suiure les resolutions qui sont prises és assemblees des trois Estats de vostre Royaume legitiment conuoquez, Les Roys vos predecesseurs, Sire, n'ot point trouué de moyen plus prompt pour remedier aux malladies violentes de leur Estat que d'vser de ce remede côme le plus doux & le plus iuste de tant plus qu'il doit estre sans violence & sans contraincte, & qu'en icelluy tous les membres du corps dont



vous estes le chef peuuent librement representer leurs vlcères, faire leurs plainctes & doleances , pour sur icelles leur estre pourueu de remede conuenable pour leur bien & guerison.

Or SIRE, comme en ceste action le Prince daigne bien communiquer en quelque façon son autorité, a ses subiects: Aussi est-il de son deuoir puisque volontairement il s'y soubmet de ne leur y faire violence: mais de les laisser libres, & en leurs personnes, & en leurs voix, afin que les choses qui y serót traictees passent selon qu'il sera trouué expedient & iuste. Je le vous dicts, SIRE, d'autant que la malice du siecle ou nous sommes encores n'a pas tousiours donné à ceste compagnie la liberté qu'elle doit auoir; Il s'est faict depuis soixante ans quelques assemblees d'Estats, mais plustost à ruyné qu'à restauration: Ou si les desseins en ont esté bons & legitimes, la suite en a esté corrompue par les artifices de ceux qui n'auoyent rien moins au cœur, que l'amour & grandeur du Prince, & la reformation du desordre en l'Estat. Mais qui sous ces beaux & specieux pretextes visoyent seulement à leur establissement, & aux moyens pour paruenir au but particulier qu'ils s'estoient proposé. Aussi de telles assemblees le public n'a remporté que

ruyne, & desolation, au lieu de l'ordre & du repos qu'il y deuoit trouuer.

Vostre Maiesté, SIRE, meué d'un saint desir & affection de voir son Estat resflorir & reprendre le mesme lustre qu'il auoit du viuant du feu Roy son pere, & chasser le desordre qui s'y est glissé pendant sa Minorité: A trouué bon de conuoquer l'assemblée desdis trois Estats de son Rayaume, pour sur cela prendre leurs bon aduis & conseil, & trouuer les moyens conuenables pour son reestablishement. Vostre Maiesté a pris vne resolutio digne d'elle. Il ne reste plus qu'à l'executer sincerement. Et à cela, Sire, vous deuez vaquer courageusement, comme à chose de laquelle vous tirerez honneur & vtilité; honneur pource que ceste action vous fera vn tesmoin sans reproche de vostre zele enuers vostre Estat & vos peuples, & du soin que vous auez d'augmenter leur gloire, Vtilité d'autant que par le reglement de vos affaires vous aurez plus de moyen d'entretenir les despences necessaires pour le maintenir en paix, sãs vser de moyens extraordinaires à la foule & surcharge de vostre peuple. mais aussi deuez vous aduiser que sous ombre de vostre auctorité la corruptio n'y entre point: Car vous y feriez vne recõtre toute opposee qui ne pourroit qu'alte-

rer bien fort son repos. Que vostre Maieſté  
 confidere que ceste aſſemblee repreſente le  
 corps de tout vostre Eſtat, & bien qu'elle ne  
 ſoit compoſee que de peu de perſonnes, au  
 regard de ceste grande multitude qui vit  
 en iceluy. Si eſt-ce que ſes petites ſouës par  
 leur harmonie peuuent faire iouer le grand  
 reſſort & le diſpoſer à la meſure quelles luy  
 voudront donner: ſi bien que ſi elles ſont  
 violentees oultre leur cours ordinaire, il eſt  
 à craindre quelles ne le facent entrer en de-  
 faux accords, & en fin en vn deſuoïement  
 general qui ne pouroit cauſer qu'une mal-  
 ladie vniuerſelle tant au chef comme aux  
 membres. Les derniers Eſtatz Dorleãs & de  
 Bloys vous en feront foy comme ayâs eſté  
 de la qualité de ceux qui ont donné leur  
 coup à ceſt Eſtat, & l'ont reduict aux aboys  
 que nous l'auons veu par les moyens que  
 vostre Maieſté eſt conſeillée de fuir ſi elle l'e  
 veut garentir. Mais au contraire pour en  
 tirer le fruit des legitimes & tel qu'elle peut  
 eſperer de ceste cōuocatiō. Que vostre Ma-  
 ieſté ne permette en quelque ſorte que ce  
 ſoit la deſbauche des Depputez, Mais qu'elle  
 le les reçoïue au meſme Eſtat qu'ils ſont ve-  
 nus ſans que l'artifice opere en leur endroict  
 ſoit par promeſſes intimidations, ou autres  
 moyens par leſquels ils ſe pourroyent cor-  
 rompre



rompre. Qu'elle ait en execration ceux d'entr'eux quelle verra se laisser induire & emporter à autres affections, que celles qui auront leurs consciences pour iuges & tefmoins de leur deuotion, au bien de l'Estat, les maudisse avec Dieu, comme preuaricateurs, traistres & deserteurs de leur patrie, larrons publics, mercenaires lasches & vilains, & ennemis de la France. Qu'elle reçoie benignement leur doleances, & leur y face droit: Qu'elle poise diligemment les aduis qui luy seront donnez, pour le reglemēt de son Estat, & ne les mesure qu'à l'aune de l'vtilité publique, sans autre cōsideration: Qu'elle face obseruer de point en point ce qui y sera resolu, sans contrauention de qui que ce soit. Si vostre Majesté faict ces choses, elle verra en peu de temps renaistre ceste belle fleur de Lys qui s'en va morte, & son Estat reprendre la vigueur que vostre Minorité luy a rauye.

Il y a encores, Sire, vne seruitude, à laquelle V. M. se doit ranger, cōme celle qui a aussi la iustice pour garand, & celle-là consiste és iustes refus que vos officiers souuerains peuuent faire de vos Edicts, non poisez à la balance. Et ceste subiection despend tousiours de ce deuoir du bon Roy, de ne commander que choses iustes. Et partant, il vous sera honora-

ble, pour n'encourir le titre opposé de v<sup>ous</sup> y assuiection. Les Roys par importunité ou mauuais conseil, mesmes souuēt contre leur volonté peuuent commander des choses esloignées de la raison; l'execution desquel- les pourroient faire breche à leur grandeur, si ils ne se soubmettoient à ceste correction. Ce faisant vous euites tout reproche, & le blasme qui viēt sur ceux qui abusent de ce pou- uoir absolu, qui leur est donné: vos ancestres les ont à ceste fin establis: ayans voulu par ce moyen comme refrener ceste grande au- thorité qu'ils ont, afin d'en retenir l'excez, & qu'elle ne passe iusqu'aux vices. Les plus ab- solus d'entr'eux, si sont volontairement ab- straints és choses importātes: Et entre iceux Louys XI. (le plus entier à l'execution de ses volonte<sup>z</sup>, qui ait esté auparauāt) qui a fait dire de luy qu'il auoit mis nos Roys hors de page: Neantmoins on dit, qu'ayant fait pre- senter à la Cour, vn Ediēt qui estoit à la fou- le du peuple, lequel auroit esté refusé, apres plusieurs commandemens, par luy faict<sup>s</sup>, & reiterez, & les remōstrances de ladire Cour sur iceux, iusqu'à se vouloir desister de l'exer- cice de leurs charges, & les luy remettre. En fin ayāt recogneu son tort, & l'estāt laissé em- porter à la force de la iustice, luy iura de ne la violenter desormais, en ce qui seroit de son

deuoir. Nous auôs encores de ceste soubmission de nos Roys plusieurs autres exemples notables, mais celuy-cy suffira pour vous faire voir que biẽ qu'ils peussent toutes choses, qu'ils se sont voulu toutesfois assubiedtir à cest ordre, afin que vostre Maiesté face le semblable à la grande gloire & honneur.

Voila, SIRE, comme quoy vous pourrez porter vn anneau estroit: mais voicy comme vous vous en deuez descharger: voicy la subiection que vous debuez euitier; qu'és affaires de vostre Estat, esquelles il n'ira point de la paix publique, mais qui consistēt seulement en maniment & conduite. Vostre Maiesté prenne garde que s'en deschargeant sur autrui, elle ne s'assuiettisse à vne necessité de passer par la volonté & discretion de ceux qu'elle y aura commis: mais elle doit en se soulageant s'en faire neantmoins rendre cõpte, & retenir tousiours pardeuers elle l'authorité de la reprendre toutes & quantesfois qu'elle trouuera à propos de le faire. Car outre qu'il est bien sceât à vn Prince, de sçauoir ce qui se passe dans son Estat, & que tel soing accroist son autorité, il euitera le dāger que ses seruiteurs s'oublions de leur deuoir, fassent monopolles à son preiudice.

Vostre Maiesté doit encores aduiser de ne hausser poinct tellement le degré de ses



seruiteurs, que quād ilvoudroit, il ne les peut reduire : & celle-là est la subiection la plus dangereuse de toutes, comme celle qui donne quelquefois aux seruiteurs l'audace de vouloir deuenir Maistres. Et à cela aide merueilleusement les grandes charges, mesmes quand elles sont continuees dans les grandes familles. La longue possession donnant aux titulaires d'icelles des aduantages, qu'il est apres malaisé de retrancher qu'avec violence. C'est pourquoy vostre Maiesté doit prendre garde de ne les autoriser pas, tellement qu'elle en puisse estre bridee en ses volontez. Et si vostre Maiesté vouloit faire vne œuvre digne d'elle, elle rendroit triennales les charges importantes de son Estat, & les Gouuernemens: outre que ces changemens seroyent des recompenses honorables aux fidesles seruices, & vn prix desirable aux belles ames: Vostre Maiesté euiteroit les entreprises qu'on peut bastir sur vne si longue possession. L'execution en seroit facile, la resolution en estant prise, de l'aduis desdict Estats generaux, & en laissant iouyr leur vie durant ceux qui en sont à present pourueus.

Mais, SIRE, il y a encores vne seruitude en laquelle vostre Majesté peut entrer, qui est de tant plus dangereuse, qu'elle a pour

objet la nature & la pieté : & pour preuue de ce que ie dis, ie me contenteray de vous supplier de voir les Histoires, des Roys François II. Charles IX. & Henry III. Vous y en pourrez remarquer les causes ; comme estans ces Histoires toutes pleines de tragiques euenemens , causez par la facilité de ses Princes , à passer sans mesure ny ordre quelconque. Je vous les propose, SIRE, pour fuir, nō pour ensuiure les moyēs de gouuernement y pratiquez : au cōtraire ie penserois vous donner conseil vtile, si ie vous disois en general, de faire choses du tout opposees. Car en icelles vous y verrez dès le commencement jusqu'à la fin, vne Tragedie diuersifiee en mille sortes , iouee sur le Theatre de nostre France, par les plus grands & signalez de tout l'Estat : Le tout (sous ombre de gouuernement ) pour luy faire changer de main. Vous y verrez quatre ieunes Princes , les aucuns de grande esperance , mais abastardis es desbauches , par l'artifice des Gouverneurs, à fin de regir toutes choses absolument, & se preparer de tant mieux la voye , pour paruenir à leurs desseins. Vous y verrez vne grande Princesse, d'un grand & admirable esprit, mais ambitieux & conuoiteux du commandement, pour se maintenir en autorité , se seruir de Prince Estrangers , contre les Prin-

ces du Sang: Et à ceste fin faire iouïr des resorts innumerables, tantost de violence, tantost de douceur: Aujourd'huy de paix, demain de guerre, tousiours pour dominer, dans ce desordre, & disposer de toutes choses. Vous y verrez des Princes du Sang, vieux & ieunes: (neantmoins tres courageux) maltraitez, bassouiez, contrainsts par les affronts qui leur estoient faicts de s'absenter de leurs Cours, & tascher de conseruer leur rang par la force, qu'ils ne pouuoient faire par la raison. Vous y verrez des Estats generaux conuocquez, pour seruir de leurre à surprendre lesdicts Princes du Sang & s'en deffaire. Vous y verrez des Princes estrangers seruiteurs, sous le manteau de l'autorité du Roy, vser de toutes sortes d'inuentions & d'artifices, pour supplanter lesdicts Princes du Sang, se mettre en leurs places, & la Couronne sur leurs testes. Vous y verrez lesdicts Princes estrangers, sous pretexte de Religion, & d'en affectionner la deffence, conseiller des carnages, & les executer, à fin d'y enuelopper lesdicts Princes. Vous les y verrez honorez des principales charges de l'Estat. Conduire les armées Royales, faire des ligues & monopoles avec les estrangers, avec les sujets desdicts Roys. Diffamer leurs noms, & par escrits, & par paroles: Auoir des langues à



louage, pour celebrer leurs vertus, & la Noblesse de leurs maisons : faire courir des genealogies parmy le peuple, comme fils eussent esté les vrayz heritiers de la Couronne, & qu'à tort elle eust esté vsurpee sur leurs de-uanciers. Bref, des Princes caualler si bien les esprits des peuples, que peu s'en a fallu qu'ils ne soient paruenus par leur moyen à ce haut degré d'honneur, où ils aspiroient, avec tant d'auidité & de conuoitise. Et tout cela, SIRE, pour auoir donné trop liberalement leur auctorité à manier, à personnes qui n'estoient pas capables d'en bien vser : & desquelles par certains respects, ils n'osoient pas la retirer, quand ils eussent bien voulu.

SIRE, Si vostre Majesté veut éuiter tous ces desordres, & ne se mettre soy-mesme aux fers. Qu'à l'exēple du feu Roy son Pere, elle ne donne le maniement general de ses affaires (specialement de ses finances) qu'à personne capable, de le faire soy-mesme : (car la multitude engendre confusion) qui vous en puisse respondre: Que vous puissiez punir en cas d'abus : & duquel vous le puissiez retirer quand bon vous semblera, sans en estre retenu par aucun respect. Que tous vos grands dependent de vous, pour ne leur donner de l'auctorité, qu'autant que vos affaires le permettront, & que vostre Maiesté n'y pourra

vacquer: Qu'elle fasseure des Princes de son Sang, par des tesmoignages enuers eux de son amour & bien-veillance, & ne souffrir que leur rang & leur dignité soit mise en com-promis. Si elle fait ces choses. Vostre Maiesté, S I R E, se peut assureur, d'une autho- rité parfaite en son Estat, & d'y regner avec autant de gloire & d'honneur, qu'y a fait en son temps le feu Roy son pere, dont la memoire ne mourra iamais qu'avec les siecles.

*Dup<sup>r</sup>. x. iob. 16. 14*

F I N.





